

四庫全書薈要

• 乾隆御覽本

集部

欽定四庫全書薈要

集部

御定歷代賦彙外集卷三

臣紀昀詳

詳校官候補通判經應臣郭祚

御定歷代賦彙外集卷三

言志

豪士賦

有序

晉  
陸機

維陳主  
德之基有常而建功之路不一何則循心以為量  
者存乎我因物以成務者繫乎彼存夫我者隆殺止乎  
其域繫乎物者豐約唯所遭遇落葉俟微風以隕而風  
之力蓋寡孟嘗遭雍門以泣而琴之感以末何者欲隕

之業無所假烈風將墜之泣不足繁哀響也是故苟時  
啟於天理盡於民庸夫可以濟聖賢之功斗筭可以定  
烈士之業故曰才不半古而功已倍之蓋得之於時勢  
也歷觀古今徼一時之功而居伊周之位者有矣夫我  
之自我智士猶嬰其累物之相物昆蟲皆有此情夫以  
自我之量而挾非常之勲神器暉其顧盼萬物隨其俯  
仰心玩居常之安耳飽從諛之說豈識乎功在身外任  
出才表者哉且好榮惡辱有生之所大期忌盈害上鬼



神猶且不免人主操其常柄天下服其大節故曰天可  
離乎而時有袞服荷戟立乎廟門之下援旗誓衆奮於  
阡陌之上況乎代主制命自下裁物者哉廣樹恩不足  
以敵怨勤興利不足以補害故曰代大匠斲者必傷其  
手且夫政由甯氏忠臣所為忼慨祭則寡人人主所不  
久堪是以君顛軼軼不悅公旦之舉高平師師側目博  
陸之勢而成王不遣嫌吝於懷宣帝若負芒刺於背非  
其然者與嗟乎光於四表德莫富焉王曰叔父親莫昵

焉登帝天位功莫厚焉守節沒齒忠莫至焉而傾側顛沛僅而自全則伊生抱明允以嬰戮文子懷忠敬而齒劬固其所也因斯以言夫以篤聖穆親如彼之懿大德至忠如此之盛尚不能取信於人主之懷止謗於衆多之口過此以往惡覩其可安危之理斷可識矣又況乎餐大名以冒道家之忌運短才而易聖喆所難者哉身危由於勢過而不知去勢以求安禍積起於寵盛而不知辭寵以招福見百姓之謀已則申宮警守以崇不畜

之威懼萬民之不服則嚴刑峻制以賈傷心之怨然後  
威窮乎震主而怨行乎上下衆心日侈危機將發而方  
偃仰瞪盼謂足以夸世笑古人之未工忘已事之已拙  
知曩勲之可矜暗成敗之有會是以事窮運盡必於顛  
仆風起塵合而禍至常酷也聖人忌功名之過已惡寵  
祿之踰量蓋為此也夫惡欲之大端賢愚所共有而游  
子徇高位於生前志士思垂名於身後受生之分唯此  
而已夫蓋世之業名莫大焉震主之勢位莫盛焉率意

無違欲莫順焉借使伊人頗覽天道知盡不可益盈難  
久持超然自引高揖而退則巍巍之盛仰邈前賢洋洋  
之風俯冠來籍而大欲不乏於身至樂無愆乎舊節彌  
效而德彌廣身愈逸而名愈飭此之不為彼之必昧然  
後河海之跡堙為窮流一簣之釁積成山岳名編凶頑  
之條身厭荼毒之痛豈不謬哉故聊賦焉庶使百世少  
有寤云

世有豪士兮遭國顛沛攝窮運之歸期當衆通之所會

苟時至而理盡譬摧枯而振敗因天地以運動恒才  
瑣而功大於是禮極上曲服盡暉崇儀北辰以葺宇  
寔蘭室而桂宮撫玉衡於樞極運萬物乎掌中伊天  
道之剛健猶時至而必讐日罔中而弗昃月何盈而  
不闕襲覆車之危軌笑前乘之去穴若知險而退止  
趨歸蕃而自戢推璇璣以長謝顧萬物而高揖託浮  
雲以邁志豈咎吝之能集擠為山以自隕歎禍至於  
莫及

士不遇賦

漢董仲舒

嗚呼嗟乎遐哉邈矣時來曷遲去之速矣屈意從人非  
吾徒矣正身俟時將就木矣悠悠偕時豈能覺矣心之  
憂歟不期祿矣皇皇匪寧祇增辱矣努力觸藩徒摧角  
矣不出戶庭庶無過矣重曰生不丁三代之盛隆兮而  
丁三季之末俗以辯詐而期通兮貞士耿介而自束雖  
日三省於吾身兮猶懷進退之維谷彼實繁之有徒兮  
指其白而為黑目信嫫而視眇兮口信辯而言訥鬼神

不能正人事之變戾兮聖賢亦不能開愚夫之違惑  
出門則不可以偕往兮藏器又嗤其不容退洗心而  
內訟兮亦未知其所從也觀上古之清濁兮廉士亦  
筑筑而靡歸殷湯有卞隨與務光兮周武有伯夷與  
叔齊卞隨務光遁跡於深淵兮伯夷叔齊登山而采  
薇使彼聖人其猶周遑兮矧舉世而同迷若伍員與  
屈原兮固亦無所復顧亦不能同彼數子兮將遠遊  
而終慕於吾儕之云遠兮疑荒塗而難踐憚君子之

於行兮誠三日而不飯嗟天下之偕違兮悵無與之偕  
返孰若返身於素業兮莫隨世而輪轉雖矯情而獲百  
利兮復不如正心而歸一善紛既迫而後動兮豈云稟  
性之惟偏昭同人而大有兮明謙光而務展遵幽昧於  
默足兮豈舒采而斲顯苟肝膽之可同兮奚鬢髮之足  
辨也

悲士不遇賦

漢  
司馬遷

悲夫士生之不辰愧顧影而獨存恒克己而復禮懼志



行而無聞諒才韙而世戾將逮死而長勤雖有形而不彰徒有能而不陳何窮達之易惑信美惡之難分時悠悠而蕩蕩將遂屈而不伸使公於公者彼我同兮私於私者自相悲兮天道微哉吁嗟闊兮人理顯然相傾奪兮好生惡死才之鄙也好貴夷賤哲之亂也昭昭洞達胷中豁也昏昏罔覺内生毒也我之心矣哲已能忖我之言矣哲已能選沒世無聞古人唯恥朝聞夕死孰云其否逆順還周乍沒乍起無造福先無觸禍始委之自

然終歸一矣

感士不遇賦

有序

晉陶潛

昔董仲舒作士不遇賦司馬子長又為之余嘗以三餘之日講習之暇讀其文慨然惆悵夫履信思順生人之善行抱璞守靜君子之篤素自真風告逝大偽斯興閭閻懈廉退之節市朝驅易進之心懷正志道之士或潛玉於當年潔已清操之人或沒世以徒勤故夷皓有安歸之歎三閭發已矣之哀悲夫寓形百年而瞬息已盡

立行之難而一城莫賞此古人所以染翰慷慨屢伸而不能已者也夫導達意氣其惟文乎撫卷躊躇遂感而賦之

咨大塊之受氣何斯人之獨靈稟神智以藏照秉三五而垂名或擊壤以自歡或大濟於蒼生靡潛躍之非分常傲然以稱情世流浪而遂徂物羣分以相形密網裁而魚駭宏羅制而鳥驚彼達人之善覺乃逃祿而歸耕山嶷嶷而懷影川汪汪而藏聲望軒唐而永歎甘貧賤

以辭榮淳源汨以長分美惡作以異途原百行之攸貴  
莫為善之可娛奉上天之成命師聖人之遺書發忠孝  
於君親生信義於鄉閭推誠心而獲顯不矯然而祈譽  
嗟乎雷同毀異物惡其上妙算者謂迷直道者云妄坦  
至公而無猜卒蒙恥以受謗雖懷瓊而握蘭徒芳潔而  
誰亮哀哉士之不遇已不在炎帝帝魁之世獨祇修以  
自勤豈三省之或廢庶進德以及時時既至而不惠無  
爰生之晤言念張季之終蔽慙馮叟於郎署賴魏守以

納計雖僅然於必知亦苦心而曠歲矧夫市之無虎眩  
三夫之獻說悼賈傅之秀朗紆遠轡於促界悲董相之  
淵致屢乘危而幸濟感詰人之無偶淚淋浪以灑袂承  
前王之清誨曰天道之無親澄得一以作鑒恒輔善而  
佑仁夷投老以長饑回早夭而又貧傷請車以備惇悲  
茹薇而殞身雖好學與行義何死生之苦辛疑報德之  
若茲懼斯言之虛陳何曠世之無才罕無路之不澀伊  
古人之慷慨病奇名之不立廣結髮以從政不愧賞於

萬邑屈雄志於戚豎竟尺土之莫及留誠信於身後動  
衆人之悲泣商畫規以拯弊言始順而患入奚良辰之  
易傾胡害勝其乃急蒼旻遐緬人事無已有感有味疇  
測其理寧固窮以濟意不委曲而累已既軒冕之非榮  
豈緼袍之為恥誠謬會以取拙且欣然而歸止擁孤襟  
以畢歲謝良價於朝市

惜士不遇賦

有序

明

伍瑞隆

古人之出處也由已今人之出處也由人由人者招之

則來麾之則去由己者無心於功名道可進則進可退  
則退其實非由己也由道也孔子曰用之則行舍之則  
藏又曰邦有道貧且賤焉恥也邦無道富且貴焉恥也  
豈非由己由道之明訓哉惟其間有遇不遇存焉惟人  
之用舍世之理亂同一感恩也而大小異一知己也而  
淺深異當時孔子非不攝行相事孟子非不為卿而要  
不可以為遇也自肅皇帝始致辨於王皇二字之義尊  
之為師而至聖大賢始一遇於千古之下耳夫遇者非

由智非由力非由期約非由揣摩而忽然遇之之謂易  
曰遇主於巷又曰過其祖遇其妣不及其君遇其臣此  
遇之義也古人之行不一矣或出或處或默或語豈不  
亦紛然其轍哉而其間高爵厚祿未必賢一命不沾未  
必不肖遇者一言之義亦可容於暴主之朝不遇者全  
行之瑜而不免棄於聖人之世故或以大德而制於小  
德或以長才而困於短才或以經濟而屈於技能或以  
文章而劣於佞幸或以廉謹而棄於多慾或以高閒而



擯於喧囂此在天則為時在人則為命馮唐李廣兩無  
可爭當是之時規不必圓矩不必方準不必平繩不必  
直吉凶悔吝懸於奸邪僉小之手自非有至人者揭日  
月而行將萬古如長夜耳伯夷柳下惠百世之師也而  
使不遇仲尼則不過東魯之逐臣與西山之餓殍此下  
和所以抱泣而務光所以沈淵也太史公曰伯夷叔齊  
雖賢得夫子而名益彰顏淵雖篤學附驥尾而行益顯  
天地相遇品物咸章也姤之時義大矣哉董仲舒儒者

所為士不遇賦哀思傷毒司馬遷繼為悲士不遇賦陶  
潛又為感士不遇賦千古悲涼倡和欲絕余生也晚無  
三子之才而浮於三子之遇因援筆而續其篇使後之  
君子鑒余之志哀余之命而因以弔三子之魂云爾賦  
曰

噫惜乎傷心哉士之不遇若涉川之無舟若遠行之失  
路欲進不可欲退未能望河山而隕涕弔風物而傷神  
況安危之靡定屬貧賤而無親譬在鳥而為鳳超丹穴

而高飛却掩九苞而自晦與鳥雀而同歸譬在器而為  
琴張金玉而迴軫却寂寞乎朱絃避秦箏之豔引譬在  
馬而為駿輕千里之行塵却不逢於伯樂服鹽車而苦  
辛譬在龍而為惕恨進修之未能却德業之方成屬躍  
飛之屢更譬在衣而為領挈襟帶以無餘却值網維之  
廢空存懷袖之書譬在水而為海挹百川而會歸却要  
荒而見棄藏蛟龍而莫知譬在山而為岱恣七十君之  
迭主却一謝於秦皇永難期於漢武譬在金而為鐵發

千鎔之雄鋒却埋光於豐獄空流影於長虹譬在土而  
為石亘五岳而骨起却守其硜硜之節莫顯其巖巖之  
理譬在草而為蘭遡秋風而獨遠却閉阿嬌於長門而  
謝陳王於秋阪譬在木而為松歷隆寒而不凋却一落  
乎澗底誰引手於青霄譬在氣而為風洗天門於九重  
却閭闔之深閉扇霾陰於四封譬在室而為棟抗一木  
而支厦詎炎炎之將頽致隆隆之撓下譬在樹而為果  
剝方窮而復新却失與於君子反得廬於小人譬在筆

而為毫寫鬚眉於影響却墨海之無波絕兔鋒之蕭爽  
譬在體而為眼攝一身之光明却浮雲之蔽日望長安  
而涕零登蒼天而高舉今乘衆氣而徜徉一覽而知山  
河之本末再覽而周天地之圓方彼帝皇王伯之各有  
所師今豈日月星辰之靡有所將不降其志今不辱其  
身夷齊以還今更屬何人悲哉連與惠之中倫中慮幸  
哉虞與逸之中權中清仕止久速不可以預期今往復  
平陂不可以力爭掩雲霞於天路吸沆瀣於瑤京諒斯

人之飛舉豈僕病而未能擁四色之蓮花列七重之寶  
樹吾未適乎伊人豈宵行而畏露神龍之在九淵兮竢  
風雲之推轂黃鵠高舉於千里兮詎無心於擇木常魚  
之服非白龍之可襲兮雜縣之鐘鼓非爰居之所飲吾  
將建明月之旗接回風之軫而息乎若木之陰

答陸倕知己賦

梁任昉

原知己之時義故相知之信然乃貪廉之異貫奈勇怯  
之相懸貪在物而成累怯在我而可甄既自得於為御

復甘心於執鞭矧相知其如此獨攬涕而潺湲雖有望  
於已知更非謂其知己信偉人之世篤本侯服於陸鄉  
緬風流於道素襲衮衣與繡裳逮伊人而世載並三駿  
而龍光過龍津而一息望鳳條而載翔彼白玉之雖潔  
此幽蘭之信芳思在物之取譬非升斛而能量匹聳峙  
於東嶽比凝厲於秋霜不一飯以忘過每三錢以投渭  
匪蒙袂之敢嗟豈溝壑之能衣既蘊藉其有餘又澹然  
而無味得意同乎卷懷違方似乎仗氣類平叔而靡雕

似子臺而不朴冠衆善而貽操綜羣言而名學折高戴  
於后臺異鄒顏乎董幄探三詩於河間訪九師於淮曲  
術兼口傳之書藝廣鏗鏘之樂時坐睡而懸梁裁據梧  
而錐幄既文過而意深又理勝而辭縟咨余生之荏苒  
追歲暮而傷情測徂陰於堂下聽鳴鐘於洛城惟忘年  
之陸子定一遇於班荆余獲田蘇之價爾得海上之名  
信落魄而無產終長勤於短生饑虛表於徐步逃責顯  
於疾行子比我於叔則又方余於耀卿心照情交流言



靡惑萬類闇求千里懸渴言象可廢筌蹄自默居非連  
棟行則同車冬夜不長夏日靡餘肴核非餌絲竹豈娛  
我未舍駕子已迴輿中飲相顧悵然動色邦壤雖殊離  
會難測存異山陽之居沒非要離之側以膠投漆中離  
婁豈能識

贈任昉感知已賦

梁  
陸 倕

夜申旦而不寐獨匡坐而怨咨命僕夫而夙駕指南館  
而為期學窮書府文究辭林既耳聞而存口又目見而

登心似臨淄之借書類東武之飛翰軫工遲於長卿踰  
巧速於王粲固乃度平子而越孟堅何論孔璋而與公  
幹或欲涉其涯涘求其界畔則浩浩港港彪彪泔泔譬  
長缺於鞘中若龍淵與蜀漢濟濟冠蓋祁祁雋逸有竊  
風以味道咸交臂而屈膝或望路以窺門空升堂而入  
室彼春蘭及秋菊尚蕪絕於衆芳矧重仁與襲義信遼  
遼兮未央言追意而不逮辭欲盡而復忘竊仰高而希  
驥忽脂車而秣馬既一顧之我隆亦東壁之余假似延

陵之如舊同伯喈之倒屣附蒼蠅於驥尾託明鏡於朝  
光謂虛無而為有布籍甚於游揚於是柔條颯其成勁  
白露變而為霜歲忽忽而道盡憂與愛兮未忘聚落莖  
於虛室聽羈雀於枯楊怵鬱悵其誰語獨撫抱而增傷  
託異人以蠲憂賴奇文而愈疾索黃瓊之寄居造安仁  
之狹室車出門其已歡無論銜杯與促膝譬鄒子之吟  
松故未寒而能慄徒納壤以作高陋吞舟而為網值墨  
子之愛兼逢太丘之道廣陪九萬以齊征激三千而同

上識公沙於杵臼拔孝相於無名非夫人之為感孰云  
感於余情指北邙以作誓期鬱鬱於佳城

感知已賦

有序

唐李翱

貞元九年翱始就州府之貢舉人事其九月執文章一  
通謁於右補闕安定梁君是時梁君之譽塞天下屬詞  
求進之士奉文章造梁君門下者蓋無虛日梁君知人  
之故也亦既相見遂於翱有相知之道焉謂翱得古人  
之遺風期翱之名不朽於無窮許翱以拂拭吹噓翱初

謂面相進也亦未幸甚十一月梁君遘疾而歿漸遊  
於朋友公卿間往往皆曰吾久籍子姓名於補闕梁君  
也翱乃知非面相進也當時意謂先進者遇人特達皆  
合有是心亦未謂知己之難得也梁君歿於茲五年翱  
學聖人經籍教訓文句之旨而為文將數萬言愈昔年  
見於梁君之文弗啻數倍雖不敢同德於古人然亦常  
無忤於中心每歲試於禮部連以文章罷黜聲光晦昧  
於時俗人皆謂之固宜矣然後知先進者遇人特達亦

不皆有是心方知知己之難得也夫見善而不能知雖  
善何為知而不能譽則如勿知譽而不能深則如勿譽  
深而不能久則如勿深久而不能終則如勿久翺雖不  
肖幸辱於梁君所知君為之言於人豈非譽歟謂其有  
古人之遺風豈非深歟而逮夫終身豈非久歟不幸梁  
君短命遽歿是以翺未能有成也其誰能相繼梁君之  
志而成之歟已焉哉天之遽喪梁君也是使翺之命久  
速遭厄窮也遂賦感知已以自傷其言怨而不亂蓋小

雅騷人之餘風也其辭曰

戚戚之愁苦兮思釋去之無端彼衆人之容易兮乃志  
士之所難伊自古皆嗟兮又何怨乎茲之世獨厄窮而  
不達兮悼知音之永逝紛余生之多故兮愧特於世之  
誰知撫聖人教化之旨兮詢合古而乖時誠自負其中  
心兮嗟與俗而相違趨一名之五稔兮尚無成而淹此  
路岐昔聖賢之遑遑兮極屈辱之驅馳擇中庸之蹈難  
兮雖困頓而終不改其所為苟天地之無私兮曷不鑒

照於神祇心勁直於松柏兮淪霜雪而不衰知我者忽  
然逝兮豈吾道之已而

士伸知己賦

宋 蔡襄

古有云賤而達已者道必有裕貴而得士者禮必與鈞  
意圖榮以高世竭游名於大人威鳳下而覽德微蠖屈  
而求伸謂周公多才揮沐吐餐而延白屋顏子具聖砥  
名礪行而附青雲故我浩氣集義遊於天真默守節而  
無悶動會時而益振彬文薄乎河漢長算驚乎臣鄰指



素絃而稟潔紉香草兮生春彼美君子風度瑰偉烏在  
其蔓葛以均戚寧藉乎樹粉而接里夷廉巖而索言詣  
幽眇而均旨判桑植於異畦決斷涇於東水始傾崐而  
娛玩遽倒廩而矜侈耽聖域以同奧秩皇塗而並軌雖  
韜瑕可以取璧兼體可以收非矧或太公蛻北海之居  
安石翔東山而起我拒其歸誰執茲恥必使右雪苑之  
席展繡衣之履繩引堯舜以致君蒙合燕趙之多士苟  
氣協而聲同偕克濟乎薰美者也且夫虹玉隱乎礪石

砢硃淪乎層漪麒麟非犬羊之比鱣鯨豈螻蟻之持沔  
明淵而自得曷怵迫而外侈華屋千楹柔繒百帷積粟  
乎京坻躍馬乎騶驪匪衷藏之雅尚羌得志而弗為何  
蘊諛以煥顏何挾巧而譟辭宜乎厚德表世嘉聞蓋時  
身享崇高之貴目瞻咫尺之儀謂巧株可萬乘之器廊  
廟非一木之支得於道不伐乎衆公推於室不惜乎內  
私舉巖穴而悚觀我冠佩而來思上弗求焉無曰蔑當  
吾取下弗進焉無曰胡為我知然則人之膠於今者或

安於近泥乎古者或昧乎通擇其粉墨之異考以宮商  
之同射乃墉上蕢冝日中鳴鶴陰而子和雕虎嘯而生  
風不然則名位相雄師學相攻耕石田而待稔懷珍鬣  
而適戎故非五難而吐論和再則而處窮嗟乎木秀林  
而必摧士入朝而見嫉絳灌隱堤而賈遷椒蘭發機而  
原黜子冉膏舌而墨幽臧倉園睛而軻逸夜光明月招  
訶按劍之年流水高山沈思絕絃之日在孤見之卓越  
登羣蔽之豐密借如說困刑戮何擷其芳尹恬耔耨何

鋪其香若歲旱而澤及卒阿衡而自將惟聖哲之覲逢  
俾業履之猗昌奚仕虞而弭廢由自我而出亡秦何售  
之而遂用遽厚之而遐疆伸負弩而仇君鮑何奪徽纆  
與鋒鏑弗芥蠱乎左右麾千侯而拱天王設隕越於九  
淵幾夷衽而易鄉甯倚輈而鳴嗑桓何寶其琅琅駿肆  
語而靡著向何悟而趨下堂伊邠勲之末圖胥何利乎  
錫土越石娛新以相伴嬰何次驂而奄取平負郭而久  
貧何梯魏而康寓信鼓刀以周身何翼蕭而登輔節信

疲於游宦何怵心於皇甫正平蹶於羈雌何銜能於文  
舉亮覘時而晦身蜀何奮之於剛畝蒙署籍而委質吳  
何抗之於卒旅蹇斯類之有徒彈筠素而曷敘彼王公  
之宏畧豈數子智謀之能補畏遺德於冥鴻思灑恩乎  
施雨向使失風雲之會構奇袤之伍或侘傺於草茅或  
殲危於俘虜亘天地以寂寥尚何流嘉風而建英矩者  
哉今茲有人遠陶聖世少齒鄉黌根雲英之節奏表畛  
域而壑耕躋陵隅之峻嶺泳琅溪之淵渟若夫名山首

乎黃老鬼谷譎乎縱橫桑羊役乎術計商鞅刻乎刑名  
姑還車而却步目吾肆之豐贏既披閩吳而僑貢未幾  
唱第於天樞賦從軍兮南土天蓋五而回星莽萬端而  
外驚愚幽墨而無營憶百趾以高附愚遭環而後行噶  
譎辯以旁肆愚抑闕而箱聲紛結游以走譽愚友益而  
盡傾親冒頤而雙白又齊伐乎大庭第假田不足以羞  
旨烏敢斲外物而薦榮晞往躅而結援塊回次而崢嶸  
介語默於鄙室其誰燭之而使明勾藥牙於瘠壤又其

誰育之而使成豈云病睦而諂笑哀絃而賣名然世主  
炎黃之化鼎連邴魏之風時乎時者難值旦復旦以親  
逢儻率道而自進立誠知命抑在乎其中亂曰善知人  
者豈古有而今無善求知者豈彼智而茲愚儻固其窳  
而厚其薄必幽者綆而培者扶進抑時而退抑命爾其  
守約而于于者乎

懷知賦

宋張耒

嗟余生之苦艱涉世故而多違坐羣嘲而衆侮獨孑孑

其從誰嗟若人之好修外洵直而中奇挈余手而指津  
謂余車之不迷遵常度以夷行正六轡而安馳嗟終日  
而無禽曰固然而曷疑惟言動之合符若方圓於矩規  
振高言於皇極流餘麗於奇辭沃道德以相酬心厭滿  
而忘饑愛日月而畏別卒悠遠而多懷跂余望兮莫瞻  
將駕言其從之何出門之多難頓我馬以嗟咨山叢叢  
而造天車欲進而畏摧臨江湖以浮舟蛟龍鬱其揚鬐  
路幽迴而莫通心鬱塞而增悲贈瓊瑤以致情恐所託



之吾欺惟至技之難投或舉世而莫知僅一遇而見明  
蓋至樂之無儷彼取舍之迷方或骨肉而相遺苟我心  
之不察雖至愛而何施故烈士之報知己或殺身而不  
辭豈以生而易名誠內激而忘私風蕭蕭以戒秋蟬嘒  
嘒而鳴悲白露漙兮夕涼庭木颯其先衰羈我馬於東  
周蓋三歲其於茲老駸駸而來逼心鬱鬱而不夷顧所  
樂之莫從託宵寐兮庶幾酌尊酒以忘憂寫我心兮陳

詩

酬德賦有序

齊謝朓

右衛沈侯以冠世偉才眷余以國士以建武二年余將南牧見贈五言余時病既以不堪泣職又不獲復詩四年余忝役朱方又致一首迫東偏寇亂良無暇日其夏還京師且事讌言未遑篇章之思沈侯之麗藻天逸固難以報章且欲申之賦頌得盡其體物之旨詩不云乎無言不酬無德不報言既未敢為酬然所報者寡於德耳故稱之酬德賦其辭曰

悲夫四游之代序六龍驚而不息輕蓋靡於駿奔玉衡  
勞於拊翼嗟歲晏之眇歡曾陰默以悽惻玄武伏於重  
介宛虹潛以自匿覽斯物之用舍相羣方之動植弔悴  
軀於華省理衣簪而自敕思披文而信道散忿懣於胃  
臆嗟民生之知用知莫深於知己彼知己之為深信懷  
之其何已牽弱葛之蔓延寄陵風於松杞指曲蓬之直  
達固有憑於原泉彼排虛與蹠實又相鳴於林止興伐  
木於友生詠承筐於君子矧景行之在斯方寄言於同

恥求相仁於積習寓神心於名理惟敷牂之旅歲實興  
齊之二六奉武運之方昌觀休風之未淑龍樓儼而洞  
開梁邱煥其重複君奉筆於帝儲我曳裾於皇穆藉風  
雲之化景申遊好於蘭菊結德言而為佩帶芳猷而為  
服援雅範以自綏懿前修之所勗昔仲宣之發穎實中  
郎之倒屣及士衡之籍甚託壯武之高義有杞梓之貞  
心協丹采之輝被伊吾人之陋薄雖黼藻之何寘惟風  
雅之未變知雲網之不廓譬層棟之將傾必華棟之先

落翳明離以上賓屬傳體於纖萼周二輝而分崩擠九  
鼎於重壑雖魚鳥之欲安駭風川而回薄微天道之布  
新嗟員首其焉託余窘迹以多媿塊離尤而獨處君紆  
組於名邦貽話言於川渚悵分手於東津望徂舟而延  
佇慮古今之為隔豈山川之云阻賴先德之龍興奉英  
靈之電舉事紫泥之密勿腰青綬而容與沾後惠以竭  
來竟卒獲其笑語我艤舟以命徒將汨徂於南夏既勗  
余以炯戒又引之以風雅若笙簧之在聽雖舒憂而可

假昔疢病於漳濱思繼歌而莫寫恩靈降之未已奉京  
粉而作傳臨邦塗之永陌懷余馬於騏驎望平津而出  
宿登崇岡而興賦顧歸懷之南回引行鑣而東驅何瓌  
才之博侈申贈辭於萱樹指代匠而切偲比治素而引  
喻方含毫而報章迫紛埃之東鶩釋末位以言歸忽乘  
驛以南赴連篇章之莫酬欲寄言於往句類鍛翮之難  
矯似洞源之不注意搔搔以杼軸魂營營而馳騫爾腰  
戟於戎禁我拂劍於郎闈願同車以日夜城望昏而掩

扉時遊盤以未極睠落景之徂輝苦清顏之倏忽客歡  
賞之多違排重關而休告知南館之有依驂識門以右  
轉僕望路其如歸忘清漏之不緩惜曉露之方晞聞夫  
君之東守地隱蓄而懷仙登金華以問道得石室之名  
篇悟橐中之迫脅欲輕舉而舍旃離寵辱於毀譽去天  
伐於腥膻忽攜手以上征躋中皇之修迴巾帝車之廣  
軾擢河舟之輕艇歷星街之熠燿浮天潢之潏潏機九  
轉於玉漿練七明於神鼎吹萬化而不喧度千春之可

並齊天地於倏忽安事人間之紆綈哉

感節賦

魏  
曹  
植

攜友生而遊觀盡賓主之所求登高墉以永望冀消日以忘憂欣陽春之潛潤樂時澤之惠休望候鴈之翔集想玄鳥之來游嗟征夫之長勤雖處逸而懷愁懼天河之一迴沒我身乎長流豈吾鄉之足顧戀祖宗之靈丘唯人生之忽過若鑿石之末耀慕牛山之哀泣懼平仲之我笑折若華之翳日庶朱光之常照願寄軀於飛蓬



乘陽風而遠飄亮吾志之不從乃拊心以歎息青雲鬱  
其西翔飛鳥翩而上匿欲縱體而從之哀余身之無翼  
大風隱其四起揚黃塵之冥冥鳥獸驚以求羣草木紛  
其揚英見游魚之潏潏感流波之悲聲內紆曲而潛結  
心怛惕以中驚匪榮德之累身恐年命之早零慕歸全  
之明義庶不忝其所生

感物賦

有序

宋  
傅亮

余以暮秋之月述職內禁夜清務隙遊目藝苑於時風

霜初戒蟄類尚繁飛蛾翔羽翩翩滿室赴軒幌集明燭者必以燋滅為度雖則微物矜懷者久之退感莊生異鵲之事與彼同迷而忘反鑒之道此先師所以鄙智及齊客所以難目論也悵然有懷感物興思遂賦之云爾其辭曰

在西成之暮晷肅皇命於禁中聆蜻蛚於前廡鑒朗月於房櫳風蕭颯以陵幌霜皚皚而被墉憐鳴蜩之應節惜落景之懷東嗟勞人之萃感何夕永而慮充眇今古

以遐念若循環之無終詠倚相之遺矩希董生之方融  
鑽光燈而散衰溫聖詰之遺蹤墳素香以難暨九流紛  
其異封領三百於無邪貫五千於有宗考舊聞於前史  
訪心跡於汗隆豈夷阻之在運將全喪之由躬遊翰林  
之彪炳嘉美手於良工辭存麗而去穢旨既雅而能通  
雖源流之深浩且揚摧而發蒙習習飛蚋飄飄纖蠅緣  
幌求隙望爛思陵糜蘭膏而無悔赴朗燭而未懲瞻前  
軌之既覆忘改轍於後乘匪微物之足悼悵永念而拊

膺彼人道之為貴參二儀而比靈稟清曠以授氣修緣  
督而為經照安危於心術鏡纖兆於未形有徇末而舍  
本或耽欲而忘生碎隨侯於微爵捐所重而要輕矧昆  
蟲之所昧在智士其猶嬰悟雕陵於莊氏幾鑒濁而迷  
清仰前修之懿軌知吾跡之未并雖宋元之外占曷在  
余之克明豈知及之徒爾喟投翰以增情

感舊賦有序

唐太宗

余將問罪東夷言過洛邑聊因暇景散慮郊畿流盼城

闕之間覩弱齡遊觀之所風雲如故卉木惟新少壯不  
留忽焉白首追思曩日緬成異世感時懷舊撫轡忘歸  
握管敘情賦之云爾

惟端辰之餘隙屬凝陰於暮年時觀兵於九伐聊息駕  
於三川登臨原隰悵望郊壩覽綺紃之遊踐觀疇昔而  
依然地不改其城闕時無異其風煙想飛蓋於河曲思  
解珮於芝田挾彈銅駝之右連鑣金谷之前新指倏其  
代謝舟壑俄而貿遷屬隋季之分崩遇中原之喪亂濯

龍變為汙池平樂化為京觀天地兮厭黷人神兮憤惋  
遂收袂而電舉乃奮衣而雲翔據三秦兮鳳跼出九谷  
兮龍驤揮寶劍之虹彩迴彫戈於日光埽欃槍兮定六  
合廓氛沴兮靜八荒昔總戎於藩屏今拱已於巖廊營  
餘故柳壘有殘牆懷壯齡之慷慨撫虛躬而自傷觀世  
俗之飄忽鑒存亡於宇宙林何春而不花花非故年之  
秀水何日而不波波非昔年之溜豈獨人之易新故在  
物而難舊歲月運兮寒復暑日月流兮夜還晝信造化

之常經孰聖賢之可救於是停輿郊郭極眺山川信茲  
都之壯麗乃卜宅於姬年興亡兮代襲隆替兮相沿惟  
在德而為故實棄道而難全仰煙霞兮思子晉俯浩汗  
兮想張騫歎高蹤之靡覲嘉今譽之空傳聊憑軾而靜  
慮懷古人而悵焉況復氣結隆冬歲窮餘律對落景之  
蒼茫聽寒風之蕭瑟雲散葉而無蒂雪凝花而不實霧  
嶺斷兮疑連煙林疎兮似密節物同於前載歡憂殊於  
曩日扣沉思而多端寄翰墨而何述

感舊賦

有序

唐岑參

參相門子五歲讀書九歲屬文十五隱於嵩陽二十獻書闕下嘗自謂曰雲霄坐致青紫俯拾金盡裘弊蹇而無成豈命之過歟國家六葉吾門三相矣江陵公為中書令輔太宗鄧國公為文昌右相輔高宗汝南公為侍中輔睿宗相承寵光繼出輔弼易曰物不可以終泰故受之以否逮乎武后臨朝鄧國公由是得罪先天中汝南公又得罪朱輪翠轂如夢中矣今王道休明噫世葉



淪替猶欽若前德將施於後人參年三十未及一命肯  
一何榮矣今一何悴矣直念昔者為賦云其辭曰

吾門之先世克其昌赫矣烈祖輔於周王啟封受楚佐  
命克商二千餘載六十餘代繼厥美而有光其後闢土  
宇於荆門樹桑梓於棘陽吞楚山之神秀與漢水之靈  
長猗盛德之不隕諒嘉聲而允臧慶延自遠祐洽無疆  
自天命我唐始滅暴隋挺生江陵傑出輔時為國之翰  
斯文在茲一入麟閣三遷鳳池調元氣以無忒理蒼生

而不虧典絲言而作則闡縣絕以成規革亡國之前政  
贊聖代之新軌捧堯日以雲從扇舜風而草靡洋洋乎  
令問不已繼生鄧公世實須才盡忠致君極武登台朱  
門復啟相府重開川換新楫美傳舊梅何糾纏以相軋  
惡高門之禍來當其武后臨朝姦臣竊命百川沸騰四  
國無政昊天降其薦瘥靡風發於時令藉小人之榮寵  
墮賢良於檻穽苟憐恤以相蒙胡醜厲以職競既破我  
室又壞我門上帝懵懵莫知我冤衆人憎憎不為我言

泣賈誼於長沙痛屈平於湘沅夫物極則變感而遂通  
於是日光迴照於覆盆之下陽氣復暖於寒谷之中上  
天悔禍贊我伯父為邦之傑為國之輔又治陰陽更作  
霖雨伊廊廟之故事皆祖父之舊矩朱門不改畫戟重  
新暮出黃閣朝趨紫宸繡轂照路玉珂驚塵列親戚以  
高會沸歌鐘於上春無小無大皆為縉紳顙顙叩叩踰  
數十人嗟乎一心弼諧多樹綱紀羣小見醜獨醒積毀  
鑠於衆口病於十指由是我汝南公復得罪於天子當

是時也偏側崩波蒼黃反覆去鄉離土隳宗破族雲雨  
流離江山放逐愁見蒼梧之雲泣盡湘潭之竹或投於  
黑齒之野或竄於文身之俗嗚呼天不可問莫知其由  
何先榮而後悴曷曩樂而今憂盡世業之陵替念平昔  
之淹留嗟余生之不造常恐墮其嘉猷志學集其荼蓼  
弱冠干於王侯荷仁兄之教導方勵已以增修無負郭  
之數畝有蒿陽之一丘幸逢時主之好文不學滄浪之  
垂釣我從東山獻書西周出入二郡蹉跎十秋多遭脫

輻累遇焚舟雪凍穿屨塵緇敝裘嗟世路之其阻恐歲

月之不留睠城闕以懷歸將欲返雲林之舊遊遂撫劍

而歌曰東海之水化為田北溟之魚飛上天城有時而

復陵有時而遷理固常矣人亦其然觀夫陌上豪貴當

年高位歌鐘沸天鞍馬照地積黃金以自滿矜青雲之

坐致高館招其賓朋重門疊其車騎及其高堂傾曲池

平崔羅空悲其處所門客肯念其平生已矣夫世路崎

嶇孰為後圖豈無疇日之光榮何今人之棄余彼乘軒

而不恤爾後曾不愛我之羈孤歎君門兮何深顧盛時  
而向隅攬蕙草以惆悵步衡門而踟躕強學以待知音  
不無思達人之惠顧庶有望於亨衢

擬感舊賦有序

明王寵

正德辛未寵師事林屋先生於包山精舍凡再閱暑寒  
而退迄今庚辰八年於茲矣乃復來山中作感舊賦其  
辭曰

紛余慕夫好修兮潛大道以游神  
漭江河之浩茫兮悵

欲渡而無津彼哲匠之巍巍兮揚日月於八垠折疏麻  
之瑤華兮將以贈夫斯人亟儻恍而仰鑽兮又靡知其  
所止紛虬龍之下上兮尺蠖蜷旋於泥滓車既殆而馬  
煩兮阻山川而徙倚忽日月之我道兮去冉冉而不已  
經疇昔之故居兮志歆憾而顙泚潸淹留以無成兮將  
復修吾初服佩長劒之陸離兮冠切雲而轟轟民生各  
有所樂兮放吾道於空谷吸朝霞以為漿兮夕復餐夫  
秋鞠苟矩矱之猶存兮冀來者之可追吾令羲和弭節

今將以窮乎我師路漫漫其阻修兮殫吾生以求之亂  
曰驂駢斯皇莫余好也洵彼前修為我導也海嶽嶄巖  
何當造也長夜漫漫志懣操也矢心白日遵長道也

感遇賦

元涂 幾

歲週遭其在甲兮嗟吾行之不猶前熊羆之咆吼兮後  
猿狖之啁啾朝裹足以慘慄兮夕燎薪其鬱攸編蒙茸  
以當席兮薦蜉蝣以為羞紛百怪其並進兮類南冠之  
繫囚涕浪浪其達旦兮雜雨霰而交流玄雲黯以承宇



兮氛霧密而蒙幘羌衆人之所惡兮曰先生其豈留相  
頑童專能狡兮增吾心之隱憂余修身以不忒兮諒彼  
蒼其無尤懷連城之重璧兮乃捐棄於道周宜造物之  
隕罰兮孰爲余而見收欲隱忍以終處兮彼狙鹿其焉  
能儔望泠泠之修竹兮中有蒿萃之書樓集梁園之能  
賦兮列佩衿以來遊招先生其來歸兮又何懷乎故丘  
始雖渝而終合兮誠主人之好修吾今爰居先路兮命  
鳳凰兮翼輶終音書之不可託兮邈長風以夷猶亂曰

世無人兮莫我知兮被褐懷寶卒自迷兮菜蔬蕢藜取  
克幃兮蘭有國香乃不持兮嗚呼噫嘻從古已然豈惟  
余之慨兮

感宦籍賦

有序

明  
湯顯祖

今上丁酉三月余以平昌令上四年計如錢塘盪舟長  
日篋中故有高士傳慨然尋覽之無存也童子故以宦  
林全籍進余覽其書書官書名書地書號大若麟角細  
若牛毛晰矣備矣反覆尋玩亦可以奮孤宦之沈心窺

時賢之能事感而賦之

有平昌之令尹淹結課以孤羈偶猶夷而懊悵暫循求  
於展披頗有仙班祕錄士品玄碑巾箱失檢記室忘攜  
既宦林之有籍豈童子之無知因而取御業已忘疲歎  
閱川而閱世何此書之可怡冠二京分列省之地界標  
四季合匝歲之天時其地界也東縣遼掖西折涼舊北  
逾代薊南極滇黎控中軸於長安剖河山而四維皆百  
戰之所取豈一目之可縻署都官於南北擬周漢之東

西南簡曹而少務北備宋而多儀外則邊遥其腹幹切  
其支臺省於焉受使州郡於焉稱知有斗僻以孤鎮亦  
犬牙而交歧甫一逕以維絕或三會而扼竒下至一尉  
一候險如三毫三危有兼有特孰正孰裨莫不禹迹陟  
於周官堯封攝乎漢威猶恨缺紀官於朶衛失請吏於  
文夷其天時也選則通急之殊其候推則例閏之譎其  
期祕館視三年之學內徵以四稔為規奏計倂優而或  
殿報政當遄而或稽卧疴者往來於浹歲予寧者去住

以彌暮或遑將而往返或奄息之早遲第有聞其必鑄  
鮮存亡而闕疑覘邸報之日積直會計而改為是故日  
厯終歲而猶把宦籍逾時而輒揮在近者摘新而賞實  
市遠者豫舊以酬欺非春秋也筆削聖而竊取非易也  
先後天而奉時時之為義大矣惟名與器隨之嗟夫大  
鈞寫物皇極鑄人物與无妄人生有真吾有身而易寵  
世喪道而難貧是以羞其編戶榮乎縉紳然而布種詭  
雜值候續綸幸者乃為公侯之子卿相之孫前書厥考

有階有勲後列環衛如官如恩托江河而猥大依日月  
而常新不必學書學劍自然允武允文又若駙馬都尉  
一體天人在既富其何費獲至貴而無勤次則納貲而  
為郎亦以財而發身過此以往其勤可知矣清流之跡  
奮以文詞則必沒身乎藻綴燥吻於吟呶寒暑侵而靡  
覺骨肉怨而不辭至如羽林隸策倉門學醫吏人讀律  
中書臨池玄流理樂天文測璣莫不窮年竭晷立骨銷  
肌彼殆胡為乎爾誠亦有所用之又其甚者作奸犯科

知無不為跂榮分僂迂平取奇皆欲爭毫釐於此籍之上附咫尺於半部之餘外有乘間觝戲能畫能綦微言解頤說劍說詩日者狎客夜來祕師皆得遊大人以成名指旁流而借資下則緹騎惡子前魚弄兒一則如羆如豺一則如韋如脂無足比數何所覬睨然而物有所至事不可知買功爵於攫金之後乞告身於枕袖之時經營衣錦踐躡綦絲在主爵而無靳咤剗剗以何遺第云為之則是敵曰文不在茲嗟夫天下亦大矣仕人亦

夥矣有鳳凰之官則必有蟣蟲之使有金玉之音則必有糞土之士巨海葺龍蚌以鋪文太華總松榛而擾翠散之人有十等合之天無二日天其平也不平人則不一也而一不平謂何有一有多有終身於帝所有絕望於廊阿有十年而不調有一月而屢加有微敬而輒振有一蹶而永蹉有弱冠而崢嶸有白首而婆娑有受萬金而無譏有拾片羽而為瑕有擁旃於華美有投牒於荒屋有提醪而擬方伯有守郡而無建牙有贍僮客而



鳴豫有絕父母而勞歌有長孫曾而襲珪有鬻子女而  
還家有上壽而賜尊有自經於幽遐麗風者衍言笑而  
加翼絕津者罄號咷而靡槎得時者隨俯仰而皆妙失  
志者任語嘿以無佳徒使墨守者視此書而失據捷鬪  
者指是刻以嚴誇智愚勇怯於斯乎盡銳貧富侈嗇於  
是乎文賒細則鑽如蚊蚋大則據若蛟鼉緩則穆如埴  
簏急則慘若銛邪親屬之榮悴以此人身之軒輊匪他  
何必耆舊傳而特筆人物志以編摩第登名於仕版若

陟嶽以盈科有規有矩如琢如磨諒有朝其必市想無  
臣而不波乃有揚休山立遽戚駘駘姓名舛詭爵地參  
差鸞視蟲其一粒豹覺鼯以隨窠苟有懷而未瞑總奔  
命於旁羅是故謁選則咳成雷雨議汰則委若泥沙地  
貴則聯之以雲錦命賤則等之以風花至消詳於品列  
益撫卷而增嗟名理儔而賡售功勤埒而盜夸等奇節  
而抑真並文林而采華然則茲籍也蓋有朱紫異質淄  
澠同和者矣迨其甚也且有人焉巧若窮奇昧若渾敦


名可以冠楚杞貌足以鑄神奸物論之所必去茲籍之所獨存方災木而未已或閱季而彌尊亦有行若處子智若耆舊望足以壓折非是才足以替獻可否謂周行其必先視百爾而豈後比索名於右方復展轉而烏有或置無人之境或寄冗從之藪冷之以所必仄障之唯恐不走彼拙效其常然豈削籍之所朽徒使頑弱之人覽茲籍也耀其貴如得如驚黯其賤如失如玷懲死灰之不然慕積薪之所占身已沒其焉如貴及生而可豔

捐亢壯以和顏算幽憂而委念然則茲籍也能使人采  
色飛舉道心沈亂可觸手而偶觀難淹神而久玩忽掩  
卷而惘然吾亦多言之為幻矣

御定歷代賦彙外集卷三

謹案第七頁後七行豈三省之或廢刊本脫三字  
據陶靖節集增





緬校官庶吉士臣張能照  
校對官編修臣周厚轅  
謄錄監生臣李維翰

欽定四庫全書薈要

集部

御定歷代賦彙外集卷四

五



御定歷代賦彙外集卷四

言志

玄覽賦

梁元帝

御定歷代賦彙外集卷四

褰帷九水作牧三宮乃盱衡而言曰惟天為大惟堯  
則之惟地蓋厚惟王國之粵我皇之握鏡實乃神而  
乃聖陳六聯於八則弘九職於三令運璇樞而御宇

執玉衡而齊政大矣廣矣無得而稱俯齟齬於軒義  
諒斗筭於子姒包河圖與洛書括龍官乎鳳紀超大  
德於百王高鴻名於萬祀惟天縱於副后踰啓誦而  
惟首旣倫儒於肅成復斷獄於長壽豈止丕莊屈膝  
將令班鄭捧帚譬衡樽而待酌若懸鐘之須扣前踰  
繫象之外聲高洙泗之右伊俯已之顓愚謬聯萼於  
天衢筮東門而畫野創南國而分墟詔伯宗以為賓  
誥內史而策書用分茲於茅社從侯服而俾予類金

獸以封建非桐珪以錫處爾其湘水之東即我龜蒙  
魏甘露而分邑吳太平而定中鎮麟山之崔嵬傍龍  
跡其穹窿金城高而相屬石燕起而依風豈連鑣於  
分陝羨追蹤於二公彼琅臺之作守有彭泗之嘉名  
殊並海之分地異魚石之所城經沈子之高墉蓋水  
運之堤封謝禮樂之千櫓閱武騎之輟衝軾錦車而  
前驚驅魚軒而繼蹤無復鸞歌鳳舞唯對綠柳青松  
留吳宮之宿燕響平陵之夜鐘飛余轡而西征戍太

眞之舊營鳴節鼓之金鐺屯戎車於石城戮滔天之  
封豕斬橫海之長鯨每輟書而歎息景樹德之風聲  
從王役於鏡中浮文鷁而載鴻經謝亭而帳飲想彥  
伯之高風度五城而騁望見三冀之無窮故以飛雲  
蒼隼白鯉青桐金吾舍利鳴鶴紫宮眺方嶽乎雲間  
望赤坂之朱殷想眞長之送別懷思曠之還山此檣  
櫓而方遠彼松舟而未閑倦旅泊於新丘同渭水之  
不流或千人而並唱乍萬人之相鈎毀橋由於瑗度

鑿空資於仲謀睇三茅之靈祕懷九轉之仙記紫臺  
石室之文青首銀函之字獨有披霧之心彌軫凌雲  
之志捫殷碑之愴望挹延州之高讓并臆沸而蜚壇  
勢崎嶇而低昂見傳巴之度曲開安歌之浩唱想觀  
樂乎朝陽憶紆衣乎夕張迴余盼之美風聳余棹乎  
雲陽彼桑梓之必敬况粉榆之舊鄉將遊目於五湖  
乃浩覽於姑蘇臨閭門之跨水聳重闕而開都睇太  
伯之卜祀爰避國於勾吳去西許之樂政尊東夷之

楷模時渡谷水之陽尚想嘉禾之方壯慶亭於吳后  
雄檣李於越王觀泉亭之涌波崖巍巍而峨峨張素  
蓋而縈洲嶼馳白馬而越江施鼓洪濤於萬里曾未  
動於纖羅及戾止乎東甌登玉筍與銅牛山東武而  
遙集鴈南海而飛浮巖亭亭其似蓋氣咎咎其若樓  
登舜橋而延首瞰禹井而淹留御史之牀猶在督護  
之門不修雖濫同於借寇媿人瘼之何求皇覽揆余  
之忠誠詔入謁於承明旣攝州於淮海且作尹乎中

京慕張生之摘伏挹邊延之勵精珥金貂而待問鳴  
玉佩而趨庭兼三河及三輔總九緯乎九經揚王庭  
之後選聞褻然於前則時濫假於中台掌邦教之觀  
國乍南宮而薦士且右鄉而表德判辟雍之樂語辯  
金馬之儒墨驅安車以騁望壯天居之麗極詳夫皇  
王爰處本無定所堯都平陽舜在冀方玄王居亳成  
周卜洛故知黃旗紫蓋域中為大天地之所合風雨  
之所會陰美氣之葱葱浮卿雲之靄靄聳梁山而成

闕縈長淮而似帶昔者甘泉暉章平樂未央凌霄飛  
雨麒麟鳳凰九華仁壽百福明光玉階紫闈雕柱錦  
牆木蘭為棟文杏為梁溫臺冬燠秋牕夏涼甲乙之  
帳庚辛之枋未有祇園之右齊之仁壽用擬舟航長  
為稱首日殿月宮金池珠叢七重迢遞千柱玲瓏虹  
橋左跨鴈苑南通紫紺之堂臨水青蓮之臺帶風及  
夫皦光未旭更籌曙促猶然陽燧之火尚執驪龍之  
燭或帶桃花之綬乍響玄山之玉爰八命而建旗誠



非親而勿居應鳴鞞於龍角覆緹幕於熊車開轅門  
於淮渚泛餘皇之容與吟紫騮之長歌奏玄雲之疊  
鼓開右座而納文設左廣而投武旣風起而雲飛復  
推班而拉虎泛樓船而鬱紆憶霸楚之雄圖悲騅馬  
之不逝忘鹿逐之長驅豈烏江之天險資赤帝之神  
符於是途經灌壘水分當利彼吳王之連和延魏后  
之交質趙將軍之建節幸侍中之奉使亮鼎足其何  
言限修江而為二泊九井而問津蓋六服之都會方

函谷之設險譬魯陽之襟帶觀棄繻之裂帛見高車  
之輔軼顧濡須之故壘每當食而忘飯鬪二虎於江  
干爭兩龍於修坂旣凱捷而來旋遂鳴鏡而獨返彼  
銅山之可傷何驕容之無方已築長洲之苑復實海  
陵之倉遂稱兵而內侮宜朝起而夕亡原西陵以肇  
基始衝梯於士治載為前茅之首實表勤王之師同  
薏苡之興謗成貝錦之深疑良弓藏而高鳥盡入不  
謙而出不辭遊雷中而徜徉遇日吉而辰良祀公瑾

以桂酒薦忠肅以椒漿實討曹之英策蓋謀桓之祕  
方衣披披而屢舞神欣欣而樂康弔劉安於下雉聊  
載懷於博史或策杖而龍飛或叱石而羊起將雞鳴  
於天上遂埋魂於蒿里匪仙道之云偽蓋為仁其由  
已經釣臺而高邁過鄂渚而西浮變青門之三襲為  
黃塵之一丘城逶迤而中斷階陂陀而半留分沙羨  
而啓鎮即開蕃於夏州星尚連於翼軫舍兼分於斗  
牛麗滄浪之水清良信美乎濯纓嗟其釣而非釣復

何慮而何營羌有願而不獲拂蘭橈而上征冬已謝  
而春辭聊方舟而水嬉看白沙而似雪望却月而成  
睂臨石渚其如鏡玩弱柳其猶絲停赤壁而延佇聊  
愴望而方思吳水鄉之舟楫魏陸產之臯貌本吳長  
而魏短況地利與天時結憤風而炎上燎原火於驚  
颼灰霧霏而擊馬箭參差而麗龜成班車之逸氣碎  
當途於鹿麋分洞庭於吳上限東益於巴丘如湍澠  
之相別似涇渭之分流雖滔滔而直瀉終耿耿而橫

浮想蘭香之薦枕懷娥皇之夜遊若夫子瑜設險之  
記閭遨游泳之地既下車而踐境早詢求於方志曉  
泊鬻拳之津夕瞻荒谷之寺居柳下而布德坐棠陰  
而高視班六條於宰邑賢十部於從事每題輿於仲  
舉豈虛名乎叔治藉務隙於登臨乃紛吾之本志時  
復設羽蓋揚旌旆乘雕玉從貝帶浮雲起登高唐泛  
枉渚望涔陽荆棘生於龍門之下孤兔穴於馬牧之  
旁臨章華而流盼見舊楚之淒涼試極目乎千里何

春心之可傷其舊渚宮也夾江帶阡布濩井田通達  
交迸高門接連人腰水心之劔家給火耕之田旣追  
隨而得性實燕處而超然若平臺之中觀閣相通雄  
梁渡水壯翼臨空金堤之路銅鞮之宮閣寫凌霄路  
布麗譙橫走馬而為觀擬牽牛而作橋爾乃樹之榛  
栗椅桐梓漆三色黃甘千戶朱橘桃蔭井而成蹊萍  
浮江而泛實蟬鳴枝而候稻范飛冠而吐蜜復有水  
底石髮山筋地骨書帶新抽屏風互發反魂長生靈

壽女貞金鹽玉豉堯韭舜榮交讓之目代謝之名忘  
憂長樂枇杷鼓箏竹則簣簋綠菜交戰策皮淚沾虞  
后龍還葛陂便娟防露檀欒夾池聊右書而左琴且  
繼踵於華陰彼門人之問道各家求而有心先鉛槧  
於魚魯乃紛定於陶陰識三家之云謬知五門之可  
尋時仰稟於皇猷討巴濮於裨僚乃稜威於華墨出  
車檻之云修觀月窟之入附覩日勒之來遊旣虎牙  
而成號又龍額而為侯仰皇德之洪深疑朱離於侏

任見白題之蹋鼓看烏孫之學琴獻桂條之良賁奉  
桃枝之怪琛嗤聚米於馬援晒畫地於臧旻彼蠢爾  
之為鯁伊憑陵而未靜異黃巾於黑山非綠林於青  
嶺余喟然以指蹤實濟寬而持猛負步光之文劍驚  
漢陽之夕景麾靈琚之左轉光玳簪而右寥白雲生  
而陣合紅塵起而軍暗於是驅驕驕命蹶張迴翠蓋  
之金瓜臨絳宮之玉堂擬都護之伐已模荆尸之甲  
裳作齊軍之減竈數燕師之臥牆觀田畯於虞澤命



車右而前驅猶從戎於細柳若驅馬於長榆矜猿鳴  
之抱木傷兔走之依株每愀然而作色方載馳而轉  
軾閑放麇而興憫對亂鱗而動惻矧高宴於城隅駐  
五馬而踟躕乃有青琴碧玉絳樹綠珠西河王豹東  
野繇駒蘭缸夕然合璧斜天照流風之迴雪映出水  
之初蓮非吾心之所悅曾未始而流連濫叨榮於分  
陝踰一紀之星躔子旣生而冠字嗟留滯以迴遭罷  
臨邊之瑞節觀楚黎之臥轍向秋野之蒼茫對寒江

之幽咽散歸雲之鬱鬱吐長風之颼颼聞羌笛之哀  
怨聽胡笳之悽切慘余袂兮淚成行攀余轅兮不忍  
別奉信圭而入朝驅駟馬而乘輅旣總司於戎旅亦  
兼飾於豐貂登輦踞而目極忽平原之已超帶方達  
之九軌接馳道之三條彼重門之擊柝馮霞起以建  
標雜丹樓以藻井間青山於綺寮瞰落星之從龍覩  
燿火之迢遙鬱如蓬萊之臨滄海憬如崑崙之出絳  
霄函夏之所覲江漢之所朝若夫天不愛道地不愛

寶賓連紫達華平朱草麒麟五色飛兔雙翼集我君  
圃之旁游我帝梧之側於斯時也天子郊禘于園丘  
高玉簡於東漢邁金版於西周奏蒼璧而服大裘樂  
有雲翹之舞牲非繭栗之牛設黃琮而禮地望方澤  
乎神州節會咸池之瑄冕無繁露之旒觀三農乎九  
穀薦黍稷之種秬命甸師而清塵詔封人而出宿敬  
青壇而致虞動翠輅而祈穀時季春之上巳臨祓禊  
乎沼沚杏花發於露寒棘實浮於濛汜爰長久之御

節採日精於山趾天策夜而動星鈎陳朝而按軌予  
是時也陪玉軼飾金羈驅駉駉躍翠羆乘個儻控權  
奇寶劔昭晰綵朝陸離乍俯馬足時仰月支見靈鳥  
之占吳觀司南之候離習執鞭而珥筆雖日夕而忘  
疲粵重明堂地景已乎正陽乃八牕而四達開上圓  
而下方置陰鑒之明水設珪瓚而盈觴諄天官乎冢  
宰服端委而辨方虔植物之蕓藻鄙將饗之牛羊藉  
鴻私而置傳復推轂而懷方泝蛟川於匯澤沿鵠塞

於潯陽何蠡川之浩浩而匡岫之蒼蒼其匡岫也盤  
紆峭崿嶷嶙鬱律峻極於天千霄秀出岑嶽崎嶇烏  
兔蔽虧崕岓豁開背原面野噴飛流於天末鼓雷霆  
於巖下聳高館於雲中聯叢祠於星社雕甍綺閣吁  
可畏其欲落雲霧杳冥縈萬嶺而俱青照曜山莊岑  
堯石梁鴈門餘帳隆安故牀鏡臨江而分影爐銜花  
而共香若乃羽族徘徊察風應雷鴛鴦感夢乾鵲知  
來露華挾雌而嘯侶銜環帶壘而含猜孔接影而颺

鵬鵠交頸而毳毳爾其彭蠡際天用長百川沸渭渝  
溢激淡連延大則浩汗滉漾細則澆灌潺湲遇祈飈  
之弗爽彼所報之無愆且搏搖以九萬乍高颺而三  
千其中則有澆滂嘉魚燕羽龍鬣戴星含石蒲身雉  
軀乍浮圓鏡時泛明珠報蕩子之長信送仙人之短  
書恥觀魚而為樂解舒鴈於高緞必冀孔愉之龜當  
如噲參之鶴憤衝冠而發憤嗟吾人之施薄觀進退  
於我生每篤靖而居貞羞為金谷之富不矯石閭之

清每鞠躬而遵節藉王道之既平貴靜者人所便予得  
之於自然非三百之不足惜五十於豐年笑汙斜之行  
潦喜甘雨於石田飛新梅於倡粉拂輕絮於房縣月芝  
抽而曉落燈花開而夜然菊從風而金散荷帶水而珠  
圓已寤歌於折柳復行吟而採蓮課七分與六日推兩  
地與參天夕章程而鈎股亦判注而參連幼墳籍以自  
娛迄方今而不渝雲氣芝英之簡懸針倒薤之書絨乎  
蒸栗之帙飾乎酸棗之珠擬河獻之留真希淳于之席

珍臨秋水之至樂登春臺而自欣鑿戶牖而長望混木  
鴈而無陳嗟今來而古往聊絕筆於獲麟

哀時命賦

漢嚴忌

哀時命之不及古人兮夫何予生之不遇時往者不可  
攀援兮來者不可與期志憾恨而不逞兮抒忠情而屬  
詩夜炯炯而不寐兮懷隱憂而歷茲心鬱鬱而無告兮  
衆孰可與深謀欲愁悴而委情兮老冉冉而逮之居處  
愁以隱約兮志忱抑而不揚道壅塞而不通兮江河廣



而無梁願至崑崙之縣圃兮采鍾山之玉英攀瑤木之  
曄枝兮望閭風之板桐弱水汨其為難兮路中斷而不  
通勢不能凌波以徑度兮又無羽翼而高翔然隱憫而  
不達兮獨徙倚而徜徉悵懣惓以永思兮心紆軫而增  
傷倚躊躇以淹留兮日饑饉而絕糧羌抱景而獨倚兮  
起永思乎故鄉廓落寂而無友兮誰可與玩此遺芳白  
日晚晚其將入兮哀余壽之弗將車旣弊而馬罷兮蹇  
遭迴而不能行身旣不容於濁世兮不知進退之宜當

冠崔嵬而切雲兮，劒淋漓而縱橫。衣攝葉以儲與兮，左祛挂於扶桑。右衽拂於不周兮，六合不足以肆行。上同鑿枘於伏羲兮，下合矩矱於虞唐。願尊節而式高兮，志猶卑夫禹湯。雖知困其不改操兮，終不以邪枉害方世。並舉而好朋兮，壹斗斛而相量。衆比周以肩迫兮，賢者遠而隱藏。為鳳凰作鶉籠兮，雖翕翅其不容。靈皇其不寤知兮，焉陳詞而效忠。俗嫉妒而蔽賢兮，孰知予之從容。願舒志而抽馮兮，庸詎知其吉凶。璋珪雜於甌窶兮，

隴廉與孟陬同宮舉世以為恒俗兮固將愁苦而終窮  
幽獨轉而不寐兮惟煩懣而盈宵魂眇眇而馳騁兮心  
煩冤之恹恹志欲憾而不憺兮路幽昧而甚難塊獨守  
此曲隅兮然欲切而永歎愁修夜而宛轉兮氣涸鴻其  
若波握剗剗而不用兮操規槲而無所施騁騏驥於中  
庭兮焉能極夫遠道置猿狖於櫺檻兮夫何以責其捷  
巧駟跛鼈而上山兮吾固知其不能升釋管晏而任臧  
獲兮何權衡之能稱筦路雜於廢蒸兮機蓬矢以射革

負擔荷以丈尺兮欲伸要而不可得外迫脅於機臂兮  
上革聯於矰弋肩輕側而不容兮固陋腹而不得息務  
光自投於深淵兮不復世之塵垢孰魁摧之可久兮願  
退身而窮處鑿山楹而為室兮下披衣於水渚霧露濛  
濛其晨降兮雲依微而承宇虹霓紛其朝霞兮夕淫淫  
而淋雨怡茫茫而無歸兮悵遠望此曠野下垂釣於谿  
谷兮上要求於仙者與赤松而結友兮比王喬而為偶  
使臯羊先導兮白虎為之前後浮雲霧而入冥兮騎白

鹿而容與魂怔怔以寄獨兮汨徂往而不歸處卓卓而  
日遠兮志浩蕩而傷懷鸞鳳翔於蒼雲兮故增繳而不  
能加蛟龍潛於旋淵兮身不挂於網羅如貪餌而近死  
兮不如下遊乎清波寧幽隱以速禍兮孰侵辱之可為  
子胥死而成義兮屈原沉於汨羅雖體解其不變兮豈  
忠信之可化志忼忼而內迫兮履繩墨而不頗執權衡  
而無私兮稱輕重而不差慨塵垢之枉攘兮除穢累而  
反真形體白而質素兮中皎潔而淑清時厭飫而不用

兮且隱伏而遠身聊竄端而匿跡兮歎寂寞而無聲獨  
便惝而煩毒兮焉發憤而紆情時曖曖其將罷兮遂悶  
歎而無名伯夷死於首陽兮卒天隱而不榮太公不遇  
文王兮身至死而不得逞懷瑤象而佩瓊兮願陳列而  
無正生天墜之若過兮忽爛漫而不成邪氣襲余之形  
體兮疾憊怛而萌生願一見陽春之白日兮恐不終乎  
永年

哀千里賦

梁江淹

蕭蕭江陰兮荆山之岑北繞琅瑯碣石南馳九疑桂林  
山則異嶺奇峰橫嶼帶江雜樹億尺紅霞萬重水則遠  
天相通浮雲共色沄沄無底溶溶不測其中險如孟門  
豁若長河參差巨石縱橫龜鼉若乃夏后未鑿秦皇未  
闢嶄巖生岸迤邐成跡馳湍走浪漂沙擊石伊孟冬之  
初立出首夏以歸來自出國而辭友永懷慕而抱哀魂  
終朝以三奪心一夜而九摧徒望悲其何及銘此恨於  
黃埃於是鴻鴈既鳴秋光亦窮水黯黯兮蓮葉動出蒼

蒼兮樹色紅思雲車兮沅北望蛻裳兮澧東惜重華之  
已沒念芳草之坐空既而悄愴成憂憫默自憐信規行  
之未曠知矩步之已難雖河北之夾塏猶橘柚之不遷  
及年歲之未晏願匡坐於霸山

哀江南賦

有序

周庾信

粵以戊辰之年建亥之月大盜移國金陵瓦解余乃竄  
身荒谷公私塗炭華陽奔命有去無歸中興道銷窮於  
甲戌三日哭於都亭三年囚於別館天道周星物極不



反傳燮之但悲身世無處求生袁安之每念王室自然  
流涕昔桓君山之志事杜元凱之平生並有著書咸能  
自序潘岳之文彩始述家風陸機之詞賦先陳世德信  
年始二毛即逢喪亂貌是流離至於暮齒燕歌遠別悲  
不自勝楚老相逢泣將何及畏南山之雨忽踐秦庭讓  
東海之濱遂餐周粟下亭漂泊高橋羈旅楚歌非取樂  
之方魯酒無忘憂之用追為此賦聊以記言不無危苦  
之詞唯以悲哀為主日暮塗遠人間何世將軍一去大

樹飄零壯士不還寒風蕭瑟荆壁睨柱受連城而見欺  
載書橫階捧珠盤而不定鍾儀君子入就南冠之囚季  
孫行人留守西河之館申包胥之煩地碎之以首蔡威  
公之淚盡加之以血釣臺移柳非玉關之可望華亭鶴  
唳非河橋之可聞孫策以天下為三分衆繞一旅項籍  
用江東之子弟人唯八千遂乃分裂山河宰割天下豈  
有百萬義師一朝卷甲芟夷斬伐如草木焉江淮無涯  
岸之阻亭壁無藩籬之固頭會箕歟者合從締交鉏耰

棘矜者因利乘便將非江表王氣終於三百年乎是知  
并吞六合不免軹道之災混一車書無救平陽之禍嗚  
呼山嶽崩頽既履危亡之運春秋迭代必有去故之悲  
天意人事可以悽愴傷心者矣况復舟楫路窮星漢非  
乘槎可上風飈道阻蓬萊無可到之期窮者欲達其言  
勞者須歌其事陸士衡聞而撫掌是所甘心張平子見  
而陋之固其宜矣

我之掌庾承周以世功而為族經邦佐漢用論道而當

官稟嵩華之玉石潤河洛之波瀾居負洛而重世邑臨  
河而晏安逮永嘉之艱虞始中原之乏主民枕倚於牆  
壁路交橫於豺虎值五馬之南奔逢三星之東聚彼凌  
江而建國始播遷於吾祖分南陽而賜田裂東嶽而昨  
土誅茅宋玉之宅穿徑臨江之府水木交運山川崩竭  
家有直道人多全節訓子見於純深事君彰於義烈新  
野有生祠之廟河南有胡書之碣况乃少微真人天山  
逸民階庭空谷門巷蒲輪移談講樹就簡書筠降生世

德載誕貞臣文詞高於甲觀模楷盛於漳濱嗟有道而  
無鳳歎非時而有麟旣姦回之戾逆終不悅於仁人王  
子洛濱之歲蘭成射策之年始含香於建禮仍矯翼於  
宗賢遊滄雷之講肆蓋明離之胄筵旣傾蠡而酌海遂  
測管以窺天方塘水白釣渚池圓侍戎韜於武帳聽雅  
曲於文絃乃解懸而通籍遂崇文而會武居笠輶而掌  
兵出蘭池而典午論兵於江漢之君拭玉於西河之主  
於時朝野歡娛池臺鐘鼓里為冠蓋門成鄒魯連茂苑

於海陵跨橫塘於江浦東門則鞭石成橋南極則鑄銅  
為柱橘則園植萬株竹則家封千戶西賁浮玉南琛沒  
羽吳歆越吟荆豔楚舞草木之遇陽春魚龍之逢風雨  
五十年中江表無事王歆為和親之侯班超為定遠之  
使馬武無預於甲兵馮唐不論於將帥豈知山嶽闐然  
江湖潛沸漁陽有閭左戍卒離石有將兵都尉天子方  
刪詩書定禮樂設重雲之講開士林之學談劫燼之灰  
飛辯常星之夜落地平魚蓋城危獸角臥刁斗於滎陽

絆龍媒於平樂寧衡以干戈為兒戲縉紳以清談為廟  
略乘清水以膠船馭奔駒以朽索小人則將及水火君  
子則方成猿鶴弊軍不能救鹽池之鹹阿膠不能止黃  
河之濁既而魴魚賴尾四郊多壘殿狎江鷗宮鳴野雉  
湛盧去國餘腥失水見被髮於伊川知百年而為戎矣  
彼姦逆之熾盛久遊魂而致命大則有鯨有鯢小則為  
梟為獍負其牛羊之力凶其水草之性非玉燭之能調  
豈璿璣之可正值天下之無為尚有欲於羈縻飲其疏

璃之酒賞其虎豹之皮見胡柯於大夏識鳥卵於條枝  
豺牙密厲虺毒潛吹輕九鼎而欲問聞三川而遂窺始  
則王子名戎姦臣介冑旣官政而離遏遂師言而泄漏  
望廷尉之逋囚反淮南之窮寇出狄泉之蒼鳥起橫江  
之困獸地則石鼓鳴山天則金精動宿北闕龍吟東陵  
麟鬬爾乃桀黠構扇憑陵畿甸擁狼望於黃圖填廬山  
於赤縣青袍如草白馬如練天子履端廢朝單于長圍  
高宴兩觀當戟千門受箭白虹貫日蒼鷹擊殿竟遭夏



臺之禍終視堯城之變官守無奔問之人干戚非平戎  
之戰陶侃空爭米船顧榮虛搖羽扇將軍死綏路絕重  
圍烽隨星落書遂鳶飛遂乃韓分趙裂鼓臥旗折失羣  
班馬迷輪亂轍猛士嬰城謀臣卷舌昆陽之戰象走林  
常山之陣蛇奔穴五郡則兄弟相悲三州則父子離別  
護軍慷慨忠能死節三世為將終於此滅濟陽忠壯身  
參末將兄弟三人義聲俱唱主辱臣死名存身喪敵人  
歸元三軍悽愴尚書多算守備是長雲梯可拒地道能

防有齊將之閉壁無燕師之臥牆大事去矣人之云亡  
申子奮發勇氣咆勃實總元戎身先士卒胄落魚門兵  
填馬窟屢犯通中頻遭刮骨功業天枉身名埋沒或以  
隼翼鷄披虎威孤假沾漬鋒鏑脂膏原野兵弱虜強城  
孤氣寡聞鶴唳而心驚聽胡笳而淚下據神亭而亡戟  
臨橫江而棄馬崩於鉅鹿之沙碎於長平之瓦於是桂  
林顛覆長洲麋鹿潰潰沸騰茫茫慘黷天地離阻人神  
慘酷晉鄭靡依魯衛不睦競動天關爭迴地軸探雀穀

而未飽待熊蹯而詎熟乃有車側郭門筋懸廟屋鬼同  
曹社之謀人有秦庭之哭爾乃假刻璽於關塞稱使者  
之酬對逢郢坂之譏嫌值郢門之征稅乘白馬而不前  
策青驃而轉礙吹落葉之扁舟飄長風於上游彼鋸牙  
而鈎爪又巡江而習流排青龍之戰艦鬪飛燕之船樓  
張遼臨於赤壁王濬下於巴丘乍風驚而射火或箭重  
而回舟未辨聲於黃蓋已先沈於杜侯落帆黃鶴之浦  
藏船鸚鵡之洲路已分於湘漢星猶看於斗牛若乃陰

陵失路釣臺斜趣望赤壁而沾衣機鳥江而不渡雷池  
柵浦鵲陵焚戍旅舍無煙巢禽無樹謂荆衡之杞梓庶  
江漢之可恃淮海維揚三千餘里過漂渚而寄食託蘆  
中而渡水屈於七澤濱於十死嗟天保之未定見殷憂  
之方始本不達於危行又無情於祿仕謬掌衛於中軍  
濫尸丞於御史信生世等於龍門辭親同於河洛奉立  
身之遺訓受承書之顧託昔三世而無慙今七葉而方  
落泣風雨於梁山惟枯魚之銜索入欹斜之小徑掩蓬

藿之荒扉就汀洲之杜若待蘆葦之單衣於時西楚霸  
王劔及繁陽鏖兵金匱校戰玉堂蒼鷹赤雀鐵舳牙檣  
沈白馬而誓衆負黃龍而渡江海潮迎艦江萍送王戎  
車屯於石城戈船掩於淮泗諸侯則鄭伯前驅盟主則  
荀瑩暮至剖巢燠穴奔魑走魅埋長狄於駒門斬蚩尤  
於中冀然腹為燈飲頭為器直虹貫壘長星屬地昔之  
虎踞龍蟠加以黃旗紫氣莫不隨孤兔而窟穴與風塵  
而殄悴西瞻博望北臨玄圃月榭風臺池平樹古倚弓

於玉女牕扉繫馬於鳳凰樓柱仁壽之鏡徒懸茂陵之  
書空聚若夫立德立言謨明寅亮聲超於繫表道高於  
河上更不遇於浮丘遂無言於師曠以愛子而託人知  
西陵而誰望非無北闕之兵猶有雲臺之仗司徒之表  
裏經綸孤偃之惟王實勤橫琬戈而對霸主執金鼓而  
問賊臣平吳之功壯於杜元凱王室是賴深於溫太真  
始則地名全節終則山稱枉人南陽校書去之已遠上  
蔡遂獵知之何晚鎮北之負譽矜前風飈凜然水神遭

箭山靈見鞭是以螫熊傷馬浮蛟沒船才子併命俱非  
百年中宗之夷凶靖亂大雪冤恥去代邸而承基遷唐  
郊而纂祀反舊章於司隸歸餘風於正始沈猜則方逞  
其欲藏疾則自矜於已天下之事沒焉諸侯之心搖矣  
既而齊交北絕秦患西起况肯關而懷楚異端委而開  
吳驅綠林之散卒拒驪山之叛徒營軍梁漾蒐乘巴渝  
問諸淫昏之鬼求諸厭劾之符荆門遭廩延之戮夏口  
濫達泉之誅蔑因親以致愛忍和樂於彎弧既無謀於

肉食非所望於論都未深思於五難先自擅於三端登  
陽城而避險臥砥柱而求安既言多於忌刻實志勇而  
形殘但坐觀於時變本無情於急難地惟黑子城猶彈  
丸其怨則蹟其盟則寒豈冤禽之能塞海非愚叟之可  
移山况以沴氣朝浮妖精夜殞赤烏則三朝夾日蒼雲  
則七重圍軫亡吳之歲既窮入郢之年斯盡周舍鄭怒  
楚結秦冤有南風之不競值西鄰之責言俄而梯衝亂  
舞冀馬雲屯伐秦車於暢轂沓漢鼓於雷門下陳倉而



連弩渡臨晉而橫船雖復楚有七澤人稱三戶箭不麗  
於六麋雷無驚於九虎辭洞庭兮落木去潯陽兮極浦  
熾火兮焚旗貞風兮害蠱乃使玉軸揚灰龍文折柱下  
江餘城長林故營徒思拊馬之秣未見燒牛之兵章曼  
枝以轂走宮之奇以族行河無冰而馬渡關未曉而雞  
鳴忠臣解骨君子吞聲章華望祭之所雲夢偽遊之地  
荒谷縊於莫敖冶父囚於羣帥劓谷摺拉鷹鷄批擯冤  
霜夏零憤泉秋沸城崩杞婦之哭竹染相妃之淚水毒

秦涇山高趙陁十里五里長亭短亭饑隨蟄燕暗逐流  
螢秦中水黑關上泥青於時瓦解冰泮風飛電散渾然  
千里淄澠一亂雪暗如沙冰橫似岸逢赴洛之陸機見  
離家之王粲莫不聞隴水而掩泣向關山而長歎况復  
君在交河妾在清波石望夫而逾遠山望子而愈多才  
人之憶代郡公子之去清河桐陽亭有離別之賦臨江  
王有愁思之歌別有飄飄武威羈旅金微班超生而望  
返溫序死而思歸李陵之雙鳧永去蘇武之一鴈空飛

若江陵之中否乃金陵之禍始雖借人之外力實蕭牆之內起撥亂之主忽焉中興之宗不祀伯兮叔兮同見戮於猶子荆山鵲飛而玉碎隨岸蛇生而珠死鬼火亂於平林殤魂遊於新市梁故豐徙楚實秦亡不有所廢其何以昌有媯之後將育於姜輸我神器居為讓王天地之大德曰生聖人之大寶曰位用無賴之子弟舉江東而全棄惜天下之一家遭東南之反氣以鶉首而賜秦天何為而此醉且夫天道迴旋生民預焉余烈祖於

西晉始流播於東川洎余身而七葉又遭時而北遷提挈老幼關河累年死生契闊不可問天况復零落將盡靈光歸然日窮於紀歲將復始逼迫危慮端憂暮齒踐長樂之神臯望宣平之貴里渭水貫於天門驪山迴於地市幕府大將軍之愛客丞相平津侯之待士見鍾鼎於金張聞絃歌於許史豈知灞陵夜獵猶是故時將軍咸陽布衣非獨思歸王子

愍時賦

有序

梁宣帝

于謹平梁之後闔城長幼被虜入關又失襄陽故地乃  
曰恨不用尹德毅言以致於是又見邑居殘毀干戈日  
尋恥威略不振常懷憤懣乃著愍時賦以見其意其辭  
曰

嗟余命之殊薄實賦運之逢屯既殷憂而彌歲亦坎壈  
而相鄰晝營營而至晚夜耿耿而通晨望否極而反泰  
何杳杳而無津悲晉璽之遷趙痛漢鼎之移新無田范  
之明略媿夷齊之得仁遂胡顏而苟免謂小屈而或伸

豈妖沴之無已何國步之長淪恨少生而怯弱本無志  
於爪牙謝兩章之雄勇恧二策之英華豈三石於鄠杜  
異五馬於琅邪直受性而好善類蓬生之在麻冀無咎  
而需慶庶保靜而蠲邪何昊穹之不惠值上帝之紆奢  
神州鞠為茂草赤縣遶於長蛇徒仰天而太息空撫襟  
而咨嗟伊古人之有懷尚或感於知己況華萼聯於霄  
極寵渥流於無已或小善而必褒時片言而見美昔待  
罪於禹州歷三考而見紀獲免戾於明時遂超隆於宗

子始解印於稽山即驅傳於襄水彼南陽之舊國實天  
漢之嘉祉既川嶽之形勢復龍躍之基址此首賞之謬  
及謂維城之足恃值諸侯之攜貳遂留滯於楚川等勾  
踐之絕望同重耳之終焉望南枝而灑泣或東顧而潺  
湲歸歟之情何極首丘之思邈然忽值魏師入討於彼  
南荆旣兵車之赫赫俄一鼓而凌城同寤生之舍許等  
小白之全邢伊社稷之不泯實有感於生靈伊吾人之  
固陋本漂泊於流萍忽沈滯於茲土復歲月而無成昔

千乘之畿甸今七里而盤紫寡田邑而可賦闕丘井而  
求兵無河內之資峙同滎陽之未平夜騷騷而擊柝晝  
孑孑而揚旌烽連雲而迴照馬伏櫪而悲鳴既有懷於  
斯日亦焉得而云寧彼雲夢之舊都乃標奇於昔者驗  
往記以瞻今何名高而事寡寂寥井邑荒涼原野徒揄  
揚於宋玉空咨嗟於司馬南方卑而歎屈長沙濕而悲  
賈余國家之俟匡庶興周而祀夏忽縈憂於此屈豈年  
華之天假加以狗盜鼠竊蜂蠆狐狸羣圍隸而為寇聚



臧獲而成師窺臨津渚跋扈江渚屢征肇於殷歲頻戰  
起於軒時有扈興於夏典采芑善於周詩方叔振於蠻  
貊伯禽捷於淮夷在逋穢其能幾會斬馘而塞旗彼積  
惡之必稔豈天靈之可欺交川路之云壅理惆悵而未  
怡

抱關賦

有序

宋王回

嘉祐五年回始仕為衛真主簿日負吏責憫已之不如  
古人也作抱關賦

抱關之無責兮聊可充吾食兮匪可食兮吾何易兮抱  
關之無愧兮聊可由吾仕兮匪可仕兮吾何累兮抱關  
之無悶兮聊可託吾遯兮匪可遯兮吾何恩兮

經丘賦有序

明  
石 琚

頃在田畷始親稼穡徜徉丘壑亦足驩虞乃知七者之  
作意非止於逃塵三農之流事亦無夫適志樂則生矣  
而豈徒哉昔人有言佩玉而心若槁木立朝而意在東  
山竊嘗病其失出處之幾為依違之計既非懷蓋以事

君亦豈樂道而忘勢以今觀之他人有心其則不遠容  
有若此者也因感淵明崎嶇經丘之語乃作茲賦以寄  
興焉

經高丘以騁望兮獨延佇而徘徊遵臥龍之長岡兮陟  
呼鷹之故臺覽宜安之廢墟兮拾兜鍪之繡苔懷珠履  
之繽紛兮悵頗牧之不來方全趙之有國兮固用賢而  
得士倚東壤之雄狐兮扼方城之封豕雖韓魏之近交  
兮亦勤平而屢盟彼暴秦之虎噬兮又何怪乎縱橫屈

澠池之一擊兮再奪氣於連城終將相之立朝兮不踰  
漳而用兵伊振世之豪傑兮徒名存而骨朽宜達人之  
大觀兮遽託情於杯酒籍既倡而興慟兮康又疎而被  
戮相五柳之高風兮若停鸞而峙鵠予旣惜今人之分  
陰兮又慕往哲之遺躅爰崎嶇而展遊兮抱山頭之黃  
犢草茸茸而植杖兮波汎汎而浮舟樂故淵之馳魴兮  
矯出谷之鳴鵠念遠遊之旣歸兮存墨貂之敝裘撫伯  
牙之孤絃兮感莊叟之犧牛露泥泥以沾衣兮佩凌風

之縹緲逢沮溺之耦耕兮遇丈人之荷篠冽清泉之可  
濯兮瑩石鼓之宜考望唐虞之大廷兮效岡陵之善禱  
吾聞志士之未遇兮恒泮渙以徜徉苟吾道之固貞兮  
楚非存而凡非亡抱隆中之雙膝兮銷南郡之隱憂馳  
九折之畏阪兮凜飛雲之在輶悵蒼生之含望兮蹇東  
山之漫遊忽青霄之乘路兮展黃扉之大謀則夫成四  
海之式瞻兮固丘壑之所養或廟堂之潤色兮或江湖  
之夢想進機衡而霖雨兮退執掌而棲遲惟坎止而流

行兮彼蒼蒼其命之乃知參天薄日之老柏兮固何以  
異於秋菊之垂垂

遂虛賦有序

明  
盧 柟

姜次渠鄴之良郡貳為要路所忌徵入部士民傷之因  
有所賦辭曰

丙辰暮春壯遊鄴都超反隄履平蕪羊腸走險鹿角通  
衢蕩陰開其南邯鄲倚其北左引衡漳之浦右據太行  
之塞誠京邑之藩屏霸王之區域於是鴻風昌慶雲蔚

大人起神龍會決閭闔兮敘長雲滿四海兮歷河濱翔  
韓陵兮俯洹野戢曹甲兮紹前勲若乃承流三輔翊戴  
王室目牛無全害馬迸跡春秋郊行生物蕃息士女謳  
歌鳥獸翔舞式乎四國爾其優游暇豫退食在公瓦雀  
行案山鳥下廳青苔繞戶綠樹垂榮窺明月兮虛堂仰  
浮雲兮太空佐臥治於淮陽資芳猷乎廣平誠希世之  
哲匠乃邁古之化土爾迺梁父鬱興二塗並起靜無寧  
波動即覆軌蒼蠅鳴白黑溷市虎張真偽眩巾征車之

闐闐兮去東陽之舊疆歷鸛鷄之荒陂兮赴爛石之崦  
岡虎澗罷嘯龍山蔑光瑤草就歇玉琬橫傷風淒其而  
啓塗雲翳鬱而飄揚玄猿綠狖睢洩鞞踏排林蹶石羣  
呼狂驤於是賓北門張祖宴諸侯來方岳錢征馬鳴雲  
旗亂笳鼓競起金石交作絲簧迭奏絃絃懽悵圍軋護  
護發言為酸振衣為喟左右淚落莫敢仰視豺狼嗥兮  
路垂鴟梟鳴兮林間欲往從兮不可將獨處兮懷愆爾  
乃君門萬里一視無際天闔攬人闐噫鼉負虎豹環繞



鉤蛇傍衛自非飛仙捷徑而分入孰能排紫宮而謁  
上帝於是燕國大夫退而歎曰僕本澹人游心太空涇  
渭渾噩出入濛鴻等天地兮山川猶毛髮兮在躬我無  
物而不得物無我而弗通總唐許於瞬息齊菌桂於一  
終乃今神遊於太玄遂吾虛於無窮為之亂曰若有人  
兮乘紫煙入大化兮超躋筌佩冠劍兮上下昭日月兮  
回沿何蚊睫之少虞又奚足為吾芥馬

御定歷代賦彙外集卷四

御定歷代賦彙外集卷五

言志

悼騷賦

陳  
梁叔敬

彼仲尼之佐魯兮先嚴斷而後弘  
衍雖離讒以鳴邑兮卒暴誅於兩觀  
殷伊尹之協德兮暨太甲而俱寧  
寧豈齊量其幾微兮徒信已以榮名  
雖吞刀以奉命兮抉目眦於門閭  
吳荒萌其已殖兮可信顏於王廬  
圖往鏡來兮

關北在篇名旣泯沒兮後辟亦然屈平濯德兮潔顯芬  
香勾踐皐種兮越嗣不長重耳忽推兮六卿卒強趙殞  
鳴犢兮秦人入疆樂毅奔趙兮燕亦是喪武安賜命兮  
昭以不王蒙宗不幸兮長平顛荒范父乞身兮楚項不  
昌何爾生不先後兮惟洪勲以遐邁服荔裳如朱紱兮  
騁變路於奔瀨歷蒼梧之崇丘兮宗虞氏之俊乂臨衆  
漬之神林兮東勅職於蓬碣祖聖道而垂典兮褒忠孝  
以為珍旣匡救而不得兮必殞命而後仁惟賈傅其達

指兮何揚生之欺真彼皇麟之高舉兮熙太清之悠悠  
臨岷川以愴恨兮指丹海以為期

擬騷賦 有序

宋 李 綱

昔屈原放逐作離騷經正潔耿介情見乎辭然而託物  
喻意未免有謫怪怨懟之言故識者謂體慢於三代而  
風雅於戰國乃雅頌之博徒而詞賦之英傑不其然歟  
予旣以愚觸罪久寓謫所因效其體據思屬文以達區  
區之志取其正潔耿介之義去其謫怪怨懟之言庶幾

不詭於聖人目之曰擬騷其辭曰

帝混元之苗裔兮歷漢唐而揚英散枝葉於天壤兮遭  
五季而遯族於甌閩皇祖隱德而弗耀兮逮吾親而振  
名歲昭陽之淵獻兮閏夏甲申吾以降幼倥侗而顓蒙  
兮非岐嶷之夙成長遊學於四方兮爰觀光於國賓服  
詩禮之嚴訓兮傳忠孝之家聲攬百氏之所長兮味六  
經之純精常恐不德以怨及朋友兮慕節義於古人豈  
富貴之足志兮冀斯文之可鳴帶長鋏而我冠兮鏘佩

玉而琚瓊紉蘭蓀之香潔兮服蕙芷之芳馨紛吾旣襲  
此衆美兮胡敢自謂之修能誤姓名之上達兮珥史筆  
於彤庭侍穆穆之清光兮聞玉音之丁寧入則陪國論  
於青瑣兮出則扈屬車之清塵惟丘山之恩厚兮何涓  
埃之報輕悼姦邪之亂政兮汨正理而不明竊懷憤而  
鬱結兮每欲叩龍墀而力爭惟本朝之寬大兮非有鼎  
鑊斧鉞之刑何羣公之噤嘿兮咸卷舌而吞聲因積水  
之告災兮爰奏疏而上陳庶一言之悟主兮迴天照之

明明朝抗章而夕貶兮白日不諒予之精誠徒孤忠之耿耿兮任萍梗之飄零絕江淮而歷浙兮割深愛於親庭陟閩山之險阻兮予隻影之伶俜泛吾舟兮建溪弭吾節兮劍浦會計當兮委吏偷燕閑兮完庫藝蘭蕙兮九畹植松竹兮百畝餐秋菊兮落英飲木蘭兮陞露朝吾游兮翰墨之林夕吾戲兮圖書之府道既不可以行於今兮質聖賢於往古嘉溪山之秀絕兮聊逍遙以容與眺翠嶺兮泛清流桂為楫兮蘭為舟有觴詠兮自適



樂天命兮何憂悼屈原之沈汨兮悲賈誼之不修笑退  
之之戚嗟兮憫德裕之窮愁惟君子之出處兮貴體道  
以周流自任以天下之重兮何一己之為謀用則行而  
舍則藏兮又何必殺身而怨尤惟蓋棺兮事始定聊康  
強兮保天性歲寒不失其青青兮惟松柏之獨正信吾  
道以優游兮始居易以俟命亂曰已矣乎莫我知也浮  
雲蔽日兮虹蜺晝明霜露降此芳草兮百鳥寂而無聲  
恐美人之遲暮兮歲道盡而崢嶸側身西望而歎息兮

心鬱結而不平心鬱結兮何為道既不可以散兮斂而  
歸之惟靜惟正兮其殆庶幾吾方將與造物者為人兮  
又安能踈咸彭之所遺

反反騷賦有序

明徐禎卿

昔揚雄作反騷論者多過之予閔原之含忠隕鬱且復  
獲謗遂援筆慷慨賦反反騷辭曰

稽卬氏之攸肇兮累楚均之遐祗侯帝頊之流胄兮承  
靈澤之汪濊夙陳力於皇軌兮歆仁朗之所廬仄仰吾

均之深修兮羌引軀以伏羲播昌烈之赫煜兮集衆芳  
之霏霏憤遭世之眊濁兮雜紛揚於江之汜在炎漢之  
微季兮孰臨岷而悼均投東藻之欲麗兮何理拙而誹  
深冤志而抑道兮冀披誦而有明惟帝監之孔嚴兮敢  
黨族而誣貞初均幼志於粹清兮乃中情之獨與蹇厲  
節以植身兮熹浩蕩之修譽進疊疊於中行兮恐日月  
之凋邁準前修以共蹈兮違先時而逆敗約性行以赴  
渠兮經五常以綴佩靈修謂其允淑兮目成歡而叶妃

夫均既沐靈修之昵澤兮又信言之噲噲苟中路而遷  
好兮寧余心之有介汎光華之的皪兮衆睞睞而妒之  
何有懼讒與招慝兮排蛾眉而錯之颺蕙服之芬郁兮  
遭紛媚而幽毀寧遭幽以迸斥兮敢詭汙而合穢鳳凰  
翔林而挂網兮龍行陸而困蟻為鳳凰神龍豈無知兮  
亦處身之多虞所貴賢者之韞玉兮不迷邦而遐舉哀  
宗社之不長兮比干皇皇而不忍去世蔑復以相明兮  
心耿耿以無從涉湘波以南溯兮昭均心之確忠俗叢

蕭而鄣蘭兮實重華之所醜効精白以殞軀兮自先聖  
之所厚奉靈氛之玄筮兮申以巫咸之嘉告覽九州以  
求匹兮寧閨容之有淑測神占其未然兮豈均曾好此  
詭疑諗從人以辱義兮不如赴身於淤泥餐秀芬以介  
蒸兮竟河清之難俟違苟生以保譽兮夫何悔於九死  
汎浮雲之翳翳兮晦沈茫其曷排陽陵微而渝度兮晨  
北風又雨霾精徘徊而不去兮憑拙誠其未爽人情重  
於捐故兮馬冀白日之回光懷薜蘿與杜蘅兮時不與

其有芳雜緄拉以颺波兮馥烈烈其彌章精氣通於至  
清兮神髣髴以憑虛駕玉蚪與雲駉兮訪太素之舊廬  
聞至道其可承兮欽均誠之匪懈舍佚遊以自湛兮夫  
何以誅其好怪昔貞士之蒙佞兮憤伏斃而靡悔務光  
沈於淵瀨兮將惡浮埃之霏霽忠賢忉忉以苦身兮蓋  
有隱於蘗祚題三仁之所裁兮見歎譽於孔父獨耿耿  
而覲侮兮曾吾均之所尤日叩想之惟諉兮駢執正於  
陽侯

自悼賦

漢班婕妤

承祖考之遺德兮何性命之淑靈登薄軀於宮闕兮充  
下陳於後庭蒙聖皇之渥惠兮當日月之盛明揚光烈  
之翕赫兮奉殊寵於增城既過幸於非位兮竊庶幾乎  
嘉時每寤寐而紖息兮申佩離以自思陳女圖以鏡鑒  
兮顧女史而問詩悲晨婦之作戒兮哀褒閼之為郵美  
皇英之女虞兮榮任姒之母周雖愚陋之靡及兮敢舍  
心而忘茲歷年歲而悼懼兮閔蕃華之不滋痛陽祿與

柘館兮仍襁褓而離災豈妾人之殃咎兮將天命之不可求白日忽已移光兮遂晦莫而昧幽猶被覆載之厚德兮不廢捐於罪郵奉供養於東宮兮託長信之末流共灑掃於帷幄兮永終死以為期願歸骨於山足兮依松柏之餘休重曰潛玄宮兮幽以清應門閉兮禁闥扃華殿塵兮玉階落中庭萋兮綠草生廣室陰兮幃幄暗房櫳虛兮風泠泠感帷裳兮發紅羅紛綵繡兮紉素聲神眇眇兮密覲處君不御兮誰為榮俯視兮丹墀思君



兮履綦仰視兮雲屋雙涕兮橫流顧左右兮和顏酌羽觴兮銷憂惟人生兮一世忽一過兮若浮已獨享兮高明處生民兮極休勉虞精兮極樂與福祿兮無期綠衣兮白華自古兮有之

自釋賦

宋  
薛士隆

太歲貞於執徐兮涂月季惟方癸農事畢余揆其成兮  
秬亢陽與襄水飛符命之至紛兮郡府號余曰有敕緡  
泉貨惟四千兮五千杭其以糴越土性而謂余求兮郡

命違其曷可蚤夜民之飼糠粃兮又掇攘之有叵方干  
里而為畿甸兮茅苴居其百九人景希兮欲多求之孰  
有蓀樵右而左陂兮復前隄而後堰萬斛舟兮望悠揚  
而罔見苞苴昌兮根微蠹兮弗充君門狗之吠信信兮  
圓月噎於雲霧足余進而趨趨兮矢嘯嘯之靡入思昌  
儻而歸印綬兮哭哀傷而雨泣謂何求之喧泯渾兮知  
此憂云實鮮余中切而深慮兮羌謂之回遠曾憂民於  
以為國兮胡國憂為毋害敢稱民而自佚兮以求其安

秦僥天命之畢罷休兮余心之有得聊遲留兮  
隙詞而自釋

解崇賦

有序

唐柳宗元

柳子既謫猶懼不勝其口筆以玄遇干之八其贊曰赤  
舌燒城吐水於鉗其測曰君子解崇也喜而為之賦

胡赫炎熏煬之烈火兮而生夫人之齒牙上殫飛而莫  
遁旁窮走而逾加九泉焦枯而四海滲涸兮紛揮霍而  
要遮風雷唬唬以為橐籥兮回祿煽怒而喊呀炖堪輿

為獻鐵兮熱雲漢而成霞鄧林大椿不足以充於燎兮  
倒扶桑落棠膠轕而相入膏肓膏而增熾兮焚掉舌而  
彌苑天無餅兮撲無雪金匱玉鐐兮曾不自止於塵沙  
獨淒已而煥物愈騰沸而最劇吾懼夫灼爛反滅之為  
禍往提乎太玄之典訟衆正訴羣邪曰去爾中躁與外  
撓姑務清為室而靜為家詩詎是則始也汝邇今也汝  
邇涼汝者進烈汝者賒譽之猶豁天淵而覆原燎夫何  
長嘆之紛拏今汝不知清已之慮而惡人之譁不知靜

之為勝而動馬是嘉徒遑遑乎狂奔而西僚盛氣而長  
嗟不亦遑乎於是釋然自得以冷風濯熱以清源滌瑕  
履仁之實去盜之夸冠太清之玄冕佩至道之瑤華鋪  
冲虛以為席駕恬泊以為車瀏乎以遊於萬物者始彼  
狙雌倏施而以崇為利者夫何為邪

謫九年賦

唐  
劉禹錫

古稱思婦已歷九秋未必有是舉為深愁莫高者天莫  
濬者泉推以極數無踰九年伊我之謫至於數極長沙

之悲三倍其時廷尉不調行當跂而天有寒暑閏餘三  
變朝有考績明坐三見顧堯之民兮亦昏墊而有歎歎  
息兮徜徉登高高兮望蒼蒼突弁之夫我來始黃合抱  
之木我來猶芒山增昔容水改故坊童者鬱鬱兮涸者  
洋洋天覆地生菊兮無傷彼族而居鄉之投荒彼軒而  
遊昨日析楊信及澤濡俄然復常稽天道與人紀咸一  
償而一起去無久而不還焚無久而不理何吾道之一  
窮兮貫九年而猶爾噫不可得而知庸詎得而悲苟變

化之莫及乎又安用夫肖天地之形為

問大鈞賦有序

唐 劉禹錫

始余失臺郎為刺史又貶州司馬俟罪朗州三見閏月  
人咸曰數之極理當遷焉因作謫九年賦以自廣是歲  
臘月詔追明年自闕下重領連山郡印授人咸曰美惡  
周必復第行無恤歲杪其復乎居五年不得調歲二月  
有事於社前一日致齋孤居慮靜滯念數起伊人理之  
不可以曉也將質諸神乎謹貢誠馳精敢問大鈞其夕

有遇寤而次第其辭以為賦

圖方相玉兮浩其無垠  
宵冥翕闢兮走三辰以騰  
振孰主張是兮有工其神  
迎隨不見兮強名之曰大  
鈞  
敲以臨下兮巍乎雄尊  
天為獨陽高不可問  
工居其中與人差近  
身執其權心平其運  
循名想像或可以訊  
曰嘻蒙之未生其猶泥耳  
落乎埏埴唯鈞所指  
忽然為人為幸大矣  
工賦其形七情與俱  
嗇智不受畀之以愚  
坦坦之衢萬人所趨  
蒙一布武化為畏塗  
人或譽之百說徒虛



人或排之半言有餘物壯則老乃唯其常否終則傾亦  
不可長老先期而驟至今否踰數而叵量雖一夫不獲  
兮亦大化之攸病謹薦誠上問兮俛伏以聽是夕寢熟  
夢遊乎無何有之鄉抗陛級乎重霄兮異人間之景光  
中有威神巾金巾而焯煌命之使前兮其音琅琅曰吾  
大化之一工也居上臨下康其不平汝今有辭吾一以  
聽播形肖貌生類積億縹緲圖匡鎔鍊消息我之司智  
初不爾嗇不守以愚覆為汝賊既賦汝形輔之聰明盍

求世師資適攸宜胡然抗心遐想前烈倚梯青冥舉足  
斯跌韜爾智斧無為自伐鑿竅太繁天和乃洩利遑前  
誘多逢覆轍名腸內煎外火非熱今哀汝窮將厚汝愚  
剔去剛健納之柔濡塞前竅之傷夷兮招太和而與居  
貫以待人兮急以自拘道存壺奧無示四隅軌物之勢  
不作兮見傷之機自無汝不善用吾焉嗇乎且夫貞而  
騰氣者膺膺健而垂精者昊昊我居其中猶輪是蹈以  
不息為體以日新為道俛鱗蜚走灌莽苞阜乃牙乃甲

乃殛乃剖陽榮陰悴生濡死槁各乘氣化不以意造賦  
大運兮無有淑惡彼多方兮自生醜好爾奚不德余以  
驟壯姑尤我以速老邪觀汝百為又或不然赤子哇哇  
忽其能言亦既名物幾時踰蹊春耕其丘投種之日釋  
耒而歎何時實粟望所未至謂余舒舒欲其久留謂我  
瞥如我一子二誰之曲與彼蒹葭之蒼蒼兮霜霰苦而  
中堅松竹之皴皴索擗兮不若櫛筍之可憐納材葦而  
構明堂兮固容消而力完揚且之哲兮不可以常然當

錫爾以老成蒼眉皓髯山立時行去敵氣與矜色兮噤  
危言以端誠俾人望之侮黷不生爾之所得孰與壯多  
不善處老問余而何受教而回遽遽形開嚮之威神孰  
為來哉乃遽衣促盥端慮滌想委佩低簪持簿叩額而  
言曰楚臣天問不訓今臣過幸一獻三售始厚以愚終  
期以壽忘上問之罪濯已然之咎心增故術腹飽新授  
馳神清玄拜手稽首

三黜賦

宋

王禹偁

一生幾日八年三黜始貶商於親老且疾兒未免乳呱  
呱擁泣六百里之窮山唯毒蛇與鱓虎歷二稔而生還  
幸舉族而無苦再謫滁上吾親已喪几筵未收旅櫬未  
葬泣血就路痛彼蒼兮安仰移郡印於淮海信靡盬而  
鞅掌旋號赴於國哀亦事居而送往叨四入於掖垣何  
寵祿之便蕃今去齊安髮白目昏吾子有孫始笑未言  
去無騎乘留無田園羝羊觸藩老鶴乘軒不知我者猶  
謂乎郎官貴而郡守尊也於戲令尹無愠吾之所師下

惠不恥吾其庶幾卞和之刖吾乃完肌曹沫之敗吾非  
與尸緘金人之口復白圭之詩細不宥兮過可補思而  
行兮悔可追慕康侯之晝接兮苟無所施徒錫爾而胡  
為效仲尼之日省兮苟無所為雖歎鳳而奚悲夫如是  
屈於身兮不屈其道任百謫而何虧吾當守正直兮佩  
仁義期終身以行之

三黜賦

以直道事人宜  
乎三黜為韻

宋

李

綱

賢若下惠官為士師以直道而從事乃屢黜之為宜忘

已為人何爵祿之足惜舍生取義豈威武之能移法古  
守官屈身徇道位雖卑而道何所辱義或失則位焉敢  
保寧尸祿以素餐將啜菽以忘老君違必諫雖犯顏而  
何傷天聽孔昭恐獲罪之難禱何則忠以得罪分焉所  
甘以所守之惟一故遭黜而至三用則行而舍則藏顧  
有進則有退仰不愧而俯不忤夫何懼而何慙枉道事  
人美必去父母之國直心行道焉往無譖愬之談惟君  
與臣代天理事各盡其職非相為賜諫行言聽固同享

於安榮道廢身藏亦何心於怨懟惟知則止之節乃盡  
事君之義相彼君子異乎小夫以容悅得君為至計以  
緘默固位為良圖蓋亦陋矣何足算乎老柏千年凡幾  
經於凝沍精金百鍊乃可試於洪爐惟此展禽雅安降  
逸雖不辭於小官亦弗免於三黜蓋以和制行者所以  
與人為徒以直事人者所以奉天之質類夫子文之稱  
忠喜怒不形於仕已有得孟軻之不動榮辱豈存乎得  
失矧乃作士利用刑人上下其手而楚國以弊輕重其



心而漢法以淪徐有功之任司刑守法而代人以死張  
釋之之為廷尉讞獄而舉世推仁蓋聞風而有立雖愈  
久而彌新爰有時人號為拙直荷三朝之眷遇辜負明  
恩雖九謫而終歸敢忘大德惟內省不疚於聖言頗用  
舍豈繫於人力味前哲之遺風每撫篇而太息

謫居賦

宋  
張九成

嗟余之生兮西湖之濱煙雲為家兮風月為鄰一行作  
吏兮喪厥真筮仕會稽兮繼命奉常著作東觀兮出持

刑章未及佩印兮讒口傷世路險巇兮人情澆薄拂衣  
歸來兮求志獨樂溫詔三下兮辭不獲卿宗正兮侍玉  
座談堯舜兮上盛古小宗伯兮義則可知難而退兮奉  
偏親庭闈之樂兮如三春奇禍作兮湘江奔天忽崩兮  
骨欲折心糜潰兮目流血日月馳兮成永訣禍又作兮  
事更危天心仁兮哀憐之免余死兮竄江西維茲地兮  
古橫浦嶺之北兮江之潯團瘴煙兮飛霧雨七年於茲  
兮無與晤語俗目並觀兮吾何以處惟吾早聞道兮傳

孔孟用聖心兮履聖行曰君子謹獨兮無愧怍聖人樂  
天兮無適莫夏葛冬裘兮何用美飢食渴飲兮無求備  
神明昌兮窮不諱道義重兮物偕逝優哉游哉聊以卒  
歲

釋謀賦

宋  
王安石

雲冥冥兮蔽日風浩浩兮吹沙出予馳兮不得塊獨處  
兮咨嗟嗟天地兮無窮暑與寒兮相客以短褐兮憂親  
孰知予兮孔棘維抱關兮擊柝乃予仕兮所宜祿可辭

兮尚冒養孰割兮方虧豈吾事兮固拙寧我辰兮獨悖  
信物默兮有制尚可侔兮内外

定觀賦有序

宋陳造

張君錫雱不利秋闈作賦見遺辭意奇壯作定觀賦答  
之其辭曰

面頰之敷腴胸襟之恢疎譚辯之傾輸子張子眇眇高  
蹈力雄萬夫我擘儒於南州闖風壑之於菟揆若人而  
當價金華蓬山信其有餘固豈山澤之臞儒也哉胡乃

蘭傷玉缺盤跚蹙蹙黃金注而得昏美璞獻而遭刖撫  
劓緼而三歎駭霜蹄之一蹶方且寓喑鳴於雕蟲之技  
陶性真於杯中之物陳子曉之曰事之宜然而或不然  
者天之勝宜然而不得不然者人之定洞視天人之表  
而不吾滑焉君子之善應鄉也覲然笑今也愀然悲蓋  
未始得其正彼其搖搖於寵辱之樊皆於理聽之瑩乎  
夫聖之逐忠之剖賢也而懼盜也而壽理好乖於所期  
是故諉天者得以啓其口羿之射有撥其矢石之斤或

掣其肘然竟非拙工之敢偶蒲梢以一跌而棄夜光以微累而培孰非市駿藏寶者之咎以定觀之人之勝天也久矣子其尊所有勉所無黷負文藝之數周旋道德之塗吾見夫至寶橫道隨和過之必且攘取而疾趨則夫儋於前而振於後遺之寸而收之尺顧何歎歎彼託意於酒者古人有之而或以蕩心而敗德聲其怨於文者君子許之猶未足與語超然自得之徒羌吾言之率爾子其繹之是邪非乎子張子作而謝之其貌舒舒其

氣愉愉若不知得喪欣戚之何如

遣幽賦

宋張耒

居予子以無與兮出莫知其所之獨端居以終日兮耿  
默然而長思古之人不可得而見兮存者滅略之遺辭  
顧一世之異情兮余誰者其從之惟我生之拙迂兮嗟  
所慕之名奇挹廉清之遺風兮曰吾其進難而退易百  
驅不加於跬步兮却轡疾返而莫追踐斯言之不欺兮  
庶吾心之無愧日月忽其遷流兮老忽忽而既來惟所

蹈之日迷兮撫前心而自非欲改故而圖新兮從靈龜  
而問疑兆改橫而上從兮史謂余而告斯橫為窒而善  
處兮上從直達其無巇豈外拘而中泰兮或者既寒而  
將遂保爾守而無變兮神明於汝其遺之相利害而為  
術兮彼鄉人其猶恥美靈龜之告猷兮我心之所止彼  
蹢躅其安往聊安安以自恃歲冉冉以將老兮草木颯  
其告衰去蟬號乎高柳兮溢莖蓄於清池宵蟲悲鳴以  
相語兮朔羽振汎而南窺嗟吾客於東周兮周天星之



三移寫吾憂以命駕兮憑高明以遠視覽平田以茫泱  
兮瞰清洛之東駛山重複而南積兮杲嶺矗矗以鱗次  
微雲濛濛以忽布兮孤翼滅沒而高遊熊耳高高而西  
峙兮女兒奮湧而南危東平川於兩間兮散佃漁於平  
地雞犬密其相聞兮溝塍布而如綦牛羊閑以就牧兮  
鳥鳥號呼以羣嘻登故國之餘墟兮望遺宮之頽基傷  
者來世而無窮兮樂者昔人其既止惟達觀其超忽兮  
等廢興於一視考物變以自樂兮遺餞情於酒醴大人

無即而非樂兮淺夫繫物以自治彼方窘我以局促兮  
我則顧步而廣肆制憂樂於在彼兮天何貴乎明智忘  
吾憂以洋洋兮將以語夫君子

幽想賦

有序

元  
郝經

上即位之元年詔經更成於宋宋人逆之入置於儀真  
姦宄漏國相與構陷誣為款兵不受書命且偽報異聞  
者再遂不令進退自庚申至於甲子凡五年冬十有一  
月宋人乃報其國喪而復無縱釋之命幽抑無紀極而

莫適赴愬作幽愬賦以自釋辭曰

天明監觀弗蔽兮莫表著以誠陳各蹈道以執則兮于  
坦夷兮是循惟禮與信為通達兮俾行李以問津顧率  
履之弗越兮何虎尾之啗人棘予裳而柅予車兮竟蠖  
屈而莫信滑溟滓以造艱兮胡構台以愆辰習坎而入  
於坎窞兮遂蒙幕子穹旻塊百折而償於下兮墜沈坳  
而無極薦局側於智井兮重覆盆而擠石鬱憤默而屯  
惛兮觸黝然其若漆踏泥塗以墊隘兮薄湫壤而淫濕

頓濡滯而壅底兮疾重腿以侵賊  
混河魚與谷鮒兮麥麴窮兮焉  
所得顛連而無攀援兮仰千仞兮  
無涯涘責躬而反已兮抑不知其  
所自粵台宗之權輿兮兆玄鳥以  
降殷託帝乙之支屬兮分方祔於  
太原蟬聯而蔓延兮委落族而紛  
綸羌台弱植之榮特兮乃繼序乎  
其季振迅而自亢兮欲託始以立  
世襲皇風之氤氲兮紉幽蘭以為  
繫冠章甫之巍峩兮錯瓊瑰以為  
佩握火齊於天衢兮挽扶桑以載  
燧造高朗以正大兮灼羣昧而用

晦攄混沌之滓穢兮萃元精之純粹衣堯兮服舜仁為  
旗兮義為軌堅窮而石守兮望道圓而日進絕蹤兮追  
塵弗以為遠也探神區而挹道真軼乎無極之近也渴  
日而不得留兮乃以夜而為晝葺江離以為裳兮搴芙  
蓉以為袖扈辟芷以揆芳兮濯爛錦而摘繡步驥馭於  
康莊兮翥鴻鵠於雲霄越希有而出大荒兮乃度黃河而  
絕遼汎洙泗以揚波兮扇之乎以清飈掇蕙芷而挾灑  
露兮灑旭日而晞蘭苔邁靈修之際嘉兮下弓旌以為

招謂黎元之無告兮久遇毒於荼苦方焦糜於鼎鑊兮  
又薦之於刀俎俾顛連之赤子兮化白骨而撐拄血肉  
膏於原野兮腐棲苴而橫宿莽閔軀兇而拏蛇虺兮翳  
三光而污九土朕盡焉其傷心兮豈為民之父母汝其  
為吾蓋臣兮敷余孚於吳楚轉一氣為陽春兮暴殄魑  
為靈雨包載干戈兮朕亦願為好生之主越拜手稽首  
兮迺續民命則在乎茲舉畀龍節而錫虎符兮繚霞旌  
而凜霜仗遺黎若崩厥角兮將慰乎雲霓之望引餘息

而煦之以天吹兮鼓太和之泱泱變時雍而底定兮鰥  
孤廢疾者而有養攀三五以反旆兮輅成康而掉鞅姦  
宄遽為之闕塞兮憖不知其故也方血人於齒牙兮盜  
憎主人而惡也芟余御而不使之行兮斷予轡於路也  
衆梟不識夫鸞皇兮謂予日之暮也嗥噪而各為兇聲  
兮乃遷台以怒也懷照乘與夜光兮適閭擲而召疑謂  
魚目與瓦礫兮乃翻誠以為欺棄神鼎與和氏兮以康  
瓠瓠珞而為奇如射工之伺人兮故巧發其陰機弗為

社稷之遠猷兮姑詭遇於一時好逆而寇來兮則予焉  
所知會衣裳而衷甲兮執魯連為鍾儀薦棘而重圍兮  
隔天日兮江之湄溯迴而屯以遭兮設羅罟而為之縻  
錮陰谷而高且深兮入而不使之去也為嚇逼之千端  
兮覲予改於步也奈予心之不移兮屹乎不周之柱也  
倏歲月之屢遷兮春與秋其代謝交一臂而閱之兮身  
乃為之傳舍方氣數之締光兮予曷能與之爭天定亦  
能勝人兮而偽烏能易余之誠戴片天以兀處兮而豈



能拘余之心欲天飛而道游兮曾不知予身之陸沈冥  
搜而坐馳兮迅祥飈而邁往激九萬之扶搖兮歟上征  
而遐想將蹇瑤芝於玄臺兮懇於帝而稱罔虎豹乃守  
天門兮列魑魅與魍魎犬詵詵而吠人兮闔帝閭而弗  
敬仰天而呼兮孰讎吾民而若是之阻修台聖非姬昌  
與玄王兮曷為亦在夫夏臺羑里之幽豺虎縱橫兮麟  
獲而為囚鱣鯢拉其鬣鬣兮乃突梯乎蜃鮪王雖喑而  
不鳴兮蜩鳩肆其啁啾雜芳蓀於蘋蘩兮竟不別夫薰

猶日方中而見沫與斗兮蹇予之行孰為此謀挾李順  
與苟純兮王驩入室而操矛漏國而倒制兮委而莫予  
問也呼天而無與言兮撫予膺而自恨也蹇予業已如  
是兮第不忘乎吾民翩然還歸顧自視兮面四壁而無  
聞余節弊而增塵兮眇隻影而無倫漫勞心而惓惓兮  
輒申旦而弗寐載命龜而虔卜兮復端策而訊筮吉弗  
食而數奇兮再三瀆而莫契鬼神亦台違兮予焉得而  
請於帝登天而不可兮乃益入於地悠悠靡所薄兮曾

不知其為計望燕雲而不見兮聽哀鴻之嗷嗷靈修不  
可以有為兮遽違遠而鬱陶懷猷而孰為矢兮屹魏闕  
而夢勞繫眇末有以召是兮祗怨艾而自責必操存之  
頗僻兮有菟惡與隱慝無乃不能制欲兮勝於理而不  
德亦其饗功而冒進兮任乎重而弗克則亦遂非而崇  
侈兮不能執中而過以不及或昧夫幾而闇以顛兮窒  
於物而彊以塞孝不能盡親兮忠不能盡於君信不能  
及友兮誠不能格夫人是用底於寔跋兮則皆自夫子

身內咎而不敢誰尤兮中隱畏而酸辛第予之所奉行  
兮禮人而篤夫動也縱或有以自取兮何為至此極也  
戢兵兮止殺則吾君之仁也輸平兮繼好非有惡於渠  
也止予兮將焉求則亦荏禍於渠也前修與已事兮可  
以鏡視而新是圖親仁兮善鄰乃為國之訏謨合則所  
以福吾民兮阻則頓夫師徒繫天誘吾衷兮吾民之禍  
庶有豸行人竟何辜兮羌見羈而反害夫澶淵與靖康  
兮於得失之跡則固在和安而戰危兮前轍宜以為戒

謂江南之文物兮可以繼夫三代釋子卿而俾之歸兮  
乃曾不如勾奴闕太和而徵倖兮反信用乎矯誣誤國  
而不自知兮曾漢唐之不如嗟台身之在天地兮眇太  
倉之一粒吾君之命不辱兮死生不足為得失和龍之  
赤氣兮豐固有所積也自惜怙私而召亂兮從顛隕而  
弗恤也蹇台焉所望兮乃援溺而入於羽淵時不可以  
驟合兮竟却走而不前苟非台之所召兮則壤運其自  
天顧台所懷之貞珉兮猶未至於玷缺故佩之杜衡兮

有芳荃以為結擷中庭之霜華兮飾之乎吾之節擘江  
雲而綴天星兮噫孤風而抱明月吸素霓與清氛兮雖  
閨室而益白潔已而莫予污兮挺節而莫予折截玉而  
斷鐵兮冽冰而凜雪不欺天而負君兮庶無愧乎前哲  
從野馬與塵埃兮溷狐兔而蹂血已地坼而天傾兮猶  
不懇予之說在我者亦既盡兮安得復為之喋喋亂曰  
與其惡蒙以求明兮曷若靜固以養正兮與其行險以  
徼利兮曷若安時而委命兮世固不予知兮謹獨聖之

令也幽所以益吾之修兮屋漏則致予之敬也非予殄  
天民之澤兮殃民者固為之穽也

憂釋賦

元 楊維禎

天之何為使聰明而無信兮明畏之無神賢不必福兮  
壽不必仁不義而富兮好禮而貧蹠以考終兮聖泣袂  
於路麟治綈身於非罪兮冉撓疾於哲人曾日食以萬  
資兮侃九餽於旬之期即三葉而不邁兮七世或襲其  
遺飽侏儒欲死兮長九尺者飢司造虧羨兮偏既反而

曰迪逆其猶影響兮吾壹不知惠從之所歸匪仁吾弗  
依兮匪義吾弗據培德植之翹翹兮願俟時乎吾將茹  
夫何好修者見殃兮曰告予以不淑饑饉降喪兮艱我  
水菽三釜需養兮風拔庭木言陟於此兮背樹隨覆填  
孰哀其岸獄兮變孰恤其困飢惡青蠅之伺物兮肆射  
工而含機紛碩鼠之貪婪兮亦既樂萋楚之無知曾歆  
歔而侘傺兮適窮困吾此時也鮮民之不如無生兮何  
久處乎此罹也吾令箕伯叱風兮溘乎余將逝也指閭



闔以開闢兮跪敷衽於帝也愍夜田以貸恩兮貸車子  
以可假感寄輦以泄私兮亦逃資於晝火畀懷鳩以薦  
休兮賂銅鈎又為禍漫鑄山以饗餓兮抑富私而不果  
彼蒼茫以無端兮固遭遇之無恒既克定其誰憎兮諒  
靡人而弗勝逢逆境以順受兮乃先民之所程禍不怨  
夫漂瓦兮茫耳外之蜚聲吾何為不豫兮其無以心而  
累形曰相訓而助信兮吾將俟久於天人之監明諱曰  
棘人樂樂條其歡兮不自先後集百蓼兮輪根屈盤別

利器兮事會輾轉見貞士兮怵迫應物好惡眊兮窟若  
囚拘豈識道兮夷險遷乘鱣變化兮泰宇泊然吾何疑  
於袞前兮

御定歷代賦彙外集卷五

謹案卷五第十一頁前七行滯念數起按唐文粹  
數作歛

第十二頁前五行巾金巾而煒煌按唐文粹巾金  
作金甲

第十三頁後五行楚臣天問不訓按唐文粹訓作  
訓





總校官庶吉士臣張能照  
校對官編修臣周厚轅  
騰錄監生臣徐掄元